



حسن بلاسم

بيل السيد



ببليل السيد

بلبل السید © 2020 حسن بلاسم

**The Sayyid's Nightingale © 2020 Hassan Blasim**

ISBN 978-952-94-3683-5

تصمیم الغلاف: حسین بربر

حسن بلاسم

**بلبل السيد**



## حسن بلاسم الحرية واللغة

### علي بدر

طالما أدهشني حسن بلاسم، فهو وحيد بلا أسلاف، مثل قاطع الطريق بلا طريق. مثل الخارجين عن القانون في الروايات الفرنسية بلا قانون. حتى اللغة التي يستخدمها حسن بلاسم هي لغته التي يحورها كما يشاء. يستخدمها كي يتركها، لا يحنطها ولا يأخذها معه. فهي غير صالحة للاستعمال بعد أول استعمال، وهي بالية بعد أن تستنفد الهدف، فغايتها منها واضحة لتعبر عن خياله الذي يتلاعب بها بكل اتجاه، فهي التي تخضع له لا هو الذي يخضع لها، وهي تتبعه لا يتبعها، فإن جرب قوالها فليكسرهما لا من أجل أن يحييها. لا أكاد أن أعثر على كاتب حر مثله، فهو يطلق جناحيه ليطير بكل اتجاه بلا هدف، بلا عنوان، بلا منهج يسير عليه، بلا تصنيفات. فهو لم يحفل بأي تصنيف ولا بأي جنس أدبي ولا بنوع. هو يكتب لكي يحيي الصور التي تتلاحق في ذهنه، لكي يرسم الخيالات التي تتفجر في روحه بعد أن جرب حياة مدمرة مشوشة قاهرة متجبرة، لذلك فهو أمام العالم غير العقلاني، العالم المتوحش، ليس له إلا أن يتحول إلى ماكنة، أشبه بماكنة الحداثة تدخل كل الأشياء المتنوعة وغير المتشابهة لتخرج أعمالاً فنية نطلق عليها فيما بعد أعمال ما بعد الحداثة.

هل لحسن بلاسم قيمه الأدبية الخاصة؟

نعم إنه يصنع بدون مساعدة من الأبدية أو العقلانية أو الحداثة أو التراث قيمه الأدبية الخاصة، يخلق هذه العلاقات التي تجسد حقبة كاملة لا تتلخص في النفي والعبث فقط إنما تفترض المواجهة أيضاً. مواجهة مع الجميع، مع الذات أولاً، مع السلطات، أية سلطات، كائنة ما تكون هذه السلطات. سواء أكانت أخلاقية أو اجتماعية أو دينية أو سياسية لا يهم، إنها مواجهة دون أن ينتظر ما تقدمه له هذه المواجهة من أثمان، لقد تجاوز بخياله حدود هذا النفي الملزم، أو هذا الإنكار ليصل إلى لحظة عبث خالصة لم يصلها أي كاتب عربي لا من جيله ولا من الأجيال الأخرى.

هل هنالك مبنى ترتكز إليه كتابات حسن بلاسم؟

نعم إنها ترتكز إلى الكشف عن وحشية هذا العالم، عن العنف الذي يحتويه ويخفيه تحت الشكل الحضري والمتمدن. تخبرنا قصص حسن بلاسم عن عالمنا. عالمنا الذي نعيشه ونجهله. وظيفتها هي الكشف عن وجهه الحقيقي بعد أن تغطي بوجهه الزائف، أن تعريه بعد أن تستر بألف ستار وستار، تقول لنا قصص حسن بلاسم لا تصدقوا المظهر الخادع والكاذب لهذا العالم ما أن نزيل هذه القشرة النظيفة والخفيفة حتى يظهر لنا صندوق الرعب: أسلحة، سجون مظلمة، أدوات تعذيب، قتلة، مفخخات، إنه صندوق الرعب الذي تجمله مؤسسات رسمية وكتابات مثقفين وصحف، وبدلات نظيفة، وياقات بيضاء، وقفازات، واحتفالات، وتلفزيونات، وموظفون وسيمون، وسكرتيرات.

لقد كتب كتابه معرض الجثث، ليدلنا على مكان السخط وهوس الدم ورعب الكراهية والنفور والقحط في التضامن البشري،



إنه كتاب يعربنا ويعري ثقافتنا ويدلنا على عارنا، كما أنه كتاب كوني، لا يتلخص في فحص الحالة العراقية إنما الطبيعة البشرية بكليتها، وهو من نوع الكتب التي تظهر في الثقافات دون مقدمات مناسبة، إنه ينطلق هكذا مثل عبوة ناسفة، تهدم وتهز ولا تكون متسقة مع أفكار مبنية أو منظمة. إنه يظهر مثل نيزك مشتعل وسريع وخاطف، من أين جاء أين ذاهب؟ هذا ما جعل الكثيرين غير مدركين لقوته. لأنه لم يظهر من مقدمات الثقافة العراقية أو العربية، هو عابر لها، ومتخطيها، وهو متخطي حتى كاتبها، إنه بصمة لا تتكرر وربما حتى حسن بلاسم غير قادر على تكراره. إنه من الكتب التي تظهر من جنون ما في العقل البشري، من سر مخبوء، من طلاس كونية يتعذر حلها.

في عمله الجديد، بلبل السيد يأخذنا حسن بلاسم إلى تجريب آخر، تجريب أخطر. يذهب بنا هنا إلى قدس الأقداس، وهي اللغة. وليست أية لغة. إنها اللغة العربية.

أنتم تقولون إنها مقدسة، وإنها مبنية من روح الأمة ومحروسة من قبل ملائكة وتعاويد وأسرار دينية. حسن أنا قادر على استبدالها بلغة أخرى، قادر على جعل لغة ابن الشارع أن تحل محلها. وهو تحد كبير. لم يجرؤ عليه أي كاتب عربي آخر. هنالك محاولات كثيرة ظهرت بشكل متقطع في تاريخ الأدب العربي مثل كتاب (هزّ القحوف في شرح قصيدة أبي شادوف) والذي صدر عام ١٨٥٧ عد من بواكير الكتب المكتوبة بالعامية المصرية، خليط من حكايات الريف والزجل واستخدام لغة ابن الشارع، وهنالك عدة كتب في بغداد ودمشق تعود إلى القرنين الثامن عشر والتاسع عشر تكلم

عنها الأب أنستاز الكرمللي وكوركيس عواد في مجلة لغة العرب ولكنها هامشية لأنها عدت من الأدب الشعبي.

إن الدعوة للكتابة بالعامية أمر قديم، ربما ابتداءً مع رفاة الطهطاوي في بدايات العصر الحديث. وربما أقدم. فالنقد الذي وجهه حراس اللغة في التراث العربي والإسلامي لمقابسات التوحيدى قائم على اتهام «أن ما كتبه مأخوذ من كلام العوام»، ثم دعوات المستشرقين مرغليوث، ولكوكس، فلهلم سييتا الذي وضع كتاباً عن قواعد العربية العامية في مصر، وما كتبه ماسنيون عن اللهجة العراقية، وما كتب عن استبدال الكتابة العربية بالحروف اللاتينية، ودعوات جماعة شعر ولا سيما يوسف الخال، وكتابته بعض المقالات النقدية بالعامية اللبنانية، أو رواية بلابوش دنيا لشمران الياسري في العراق، غير أن هذا التيار لم يكتب له النجاح أبداً، وقد ركن لأسباب سياسية وثقافية ودينية، وهو جدال خفض صوته وقمع نهائياً. وها هو حسن بلاسم يعيد النقاش به مجدداً.

فما يميز كتابة حسن بلاسم بالعامية العراقية الحالية هي أنها عامية خالصة لا تخالطها الفصحى كما درجت عليها الكتابات الأخرى، وأنها مقطوفة من فم الشارع، فهي تجيء هكذا سلسلة، طبيعية، فظة، نابية، لا مفتعلة ولا مفروضة، تسير على نهجها، بطولها وعرضها، إنها منا ومن حولنا، فهي لهجة البسطاء، عباقرة الطريق، مثقفي المهنة، باعة المفرق، فلاسفة الزوايا المهملة، لهجة المعدمين والساخرين والمهملين. لهجة غير متسترة ولا متعالية، مثل فتاة حافية في الطريق.

فهذا هو حسن بلاسم. ربما لا تتذكره في البداية، وتكون ملامحه

غائبة عنك أو مشوشة، ولكن سرعان ما سيتأكد حضوره ووجوده وبقوة، وفي أول قراءة لك ستشعر بهذا الخيال الفالت من أي تبعية، إنه خيال حر صنعتة التجربة البشرية القاسية، هو يسميها صراعه مع الوحوش، وهذه الوحوش ليست وحوشاً أدبية فقط، إنما وحوش بشرية تحيط به وهي من داخله ومن خارجه. فأراد الهروب، فتخلص بطريقه من كل شيء وأولها الإرث، لقد شعر إن هذا التراث بكليته غير مجد له، فاستبدله بالحرية وهي التعويض عن أي ضامن وأي مطلق لا المطلق الأدبي ولا المطلق اللاهوتي ولا المطلق الاجتماعي ولا المطلق السياسي، لقد جر حسن بلاسم عربته ورحل بها، ولكن أين؟ رحل إلى اللا أين.



## بلبل السيد

اسمي محسن البلبل. وأني واختي الصغيرة زهرة يتامى. عشنه وكبرنه بيت خالي بقطاع ٢٩ بالثورة. آني مواليد الثمانينات. امي ماتت من جابت اختي زهرة، ومن صار عمري ست سنوات مات ابوي. چان رايح للعمارة لفاتحة ابن عمه، انگلب الباص بيهم واحترگ الوالد. أتمنى لو اگدر اكتب بالفصحى، بس ما اعرف وكلش صعب! صحيح آني خلصت الثالث متوسط، بس چان أكثر درس معذبني وما افهم كلشي منه، هو قواعد اللغة العربية. عود ليش نتعلم العربية الفصحى، واحنه مانحجي ولا نحب ولا نعلم بيها؟! المهم هاي مو قصتي هسه، سالفتي هي غراميات السيد! طبعا الناس كلها تعرف السيد عنده احباب ومعجبين واتباع بالملين، بس محد يگدر يسأل لو يحچي عن معجباته، الي يحلمن بيه، وموتن عليه، ويسهرن الليل يكتبن شعر بحبه! أدري الي راح اكتبه، يمكن يكلفني حياقي حتى بعد ان انهزمت من العراق. آني هسه أعيش بالسويد، وكلکم تعرفون الحسينيات واللطامة لاحگينا حتى هنا. قررت اكتب واسولف وأفرغ الي بگلبي قبل ما اتخبل! أحس بالقهر والكآبة وراح اموت من الاشتياق للعراق! قبل چم يوم التقيت بولد صديقي مغربي عايش هنا ويانه بمدينة مالمو. طبعا المغربي كلش يحب صدام، بس يحب العراقيين أكثر. گلي، العراقيين ابطال، وحتى لهجتهم بيها طعم المعارك! وگال، هواي من الدول العربية يگولون من يتكون بلدانهم (هربت من بلدي) بس العراقيين

يگولون (انهزمت من العراق) وكلامكم صحيح، يگول المغربي، الي يترك بلده ينهزم ويخسر كل شي.

قبل ما يدخلون الامريكان لبغداد، چنت اشتغل بمريدي. من آني وجاهل صغير چنت بالسوگ. كلشي اشتغلت. بعث موطه، بعدين مخضر، انوب عربانة عصير، وبعث قمصان وكابويات. ومن سحلوا تمثال صدام، چنت ابيع حبوب آرتين. لزموني الشرطة بزمن اباد علاوي، وطلعني عمي الي چان قيادي بجيش احباب الله، الي شكله السيد لمقاومة الامريكان. وصارت الثورة مدينة الصدر، بعد ما چانت مدينة صدام. ومن زعيم الي زعيم، ومن قائد الي قائد، والمدينة على نفس حالها التعبان! عمامي من النجف وخوالي من العمارة. عمامي طول حياتهم چانوا يخدمون السادة. وعمي القيادي طاهر حسين، كبر وعاش ببيوتهم، يخدمهم. وچان ٢٤ ساعة يفتخر، شلون سيدنا وقائد جيش احباب الله، كبر على ايده. طبعا عمي كلش يبالغ، والي يسمعه، يگول چان أبو السيد الروحي! عمي چان خدام يکنس وينظف ويسويلهم چاي! بس اليوم اموره غير شكل. قيادي چبير، واشتره بيت قصر، ومنتزوج اثنین نسوان، وكلمته مسموعة والناس تهابه! چان كل گرايبي متعجبين من طلعني عمي طاهر من مركز الشرطة ((محسن البلبل الخوش ولد.. الفقير الحباب الي مايطلع صوته يبيع ارتين؟! مستحيل!)) طبعا لقب البلبل طلعه الي اصدقائي القليلين بعد ان بده ينتشر تويتز بالعراق، اسمي الحقيقي محسن عبد الزهرة. آني چنت من الأوائل الي فتحو حساب بتويتز. چنت أحب النت كلش، اليوتيوب مثلا چنت مدمن عليه. چنت أغرد هواي بتويتز. بس ماچنت ادخل نفسي لا بالسياسة ولا اخبار الرياضة ولا بالدين. ما أدري شبيها الناس؟! گبل چانو يگولون يقلد

لو يعيب على الناس، هسه يسمونه ( تنمر). العراقيين حياتهم خره  
بخره، وما يتواضعون شوية، واحد يعيب ويقلد على الثاني! بتوتير  
چنت اكتب الصبح مثلا: صباح الخير على الطيبين. والظهر، اكتب  
بالعافية وأخلي صورة الغدة مالتي. وبالليل اكتب مثلا، منورين  
السهرانين! وكل يوم من هاي الأشياء، ومرات أخلي صور طيور  
حب. اكو مشكلة مزعجة صارت عندي بعد الاحتلال، كلمن چان  
يشوفني يضحك ويگول، سبحان الله چنك صدام حسين بشبابه!  
حتى السيد من شافني اول مرة، گال ((اعوذ بالله من الشيطان  
الرجيم.. ربي لحية حتى شكلك شوية يتغير، وما يشبه شكل ابن  
العوجة السافل!)) بيومها چان السيد جاي زيارة للمدينة، ومر  
على مكتب احباب الله الي يشرف عليه عمي، والي صرت اشتغل  
بيه، اجييلهم چايات ولفات. گال السيد ((حبيبي ما افتهم آني؟!  
انت طويل كلش، وعمامك كلهم أقصر مني!)) وضحك. ما عرفت  
شنو اجاوب السيد. طول حياتي ماچنت اعرف شلون اخذ وانطي  
بالحچي وية الناس. آني مخربط، وچانت مدرسة الإنكليزي ست  
بسمة تسميني، أبو الصفات. وكلامها صحيح، آني مخلص حياتي  
بالصفات. مرات مثلا اصفن بهاي الدنيا. يگولون الله خلقنا من  
طين، مرات أفكر لو الله خالقنه من طين اصطناعي، چان شگد  
صارت الدنيا سهلة وحلوة وتضحك. ما يعجبك خشمك تدوسه  
بأصبعك وتغيره مثل ما تحب. ضايح من صلعتك تسوي لك شعر.  
تسوي نفسك تفاحة لو طير لو نخلة. چان صرنا مثل بره الشاطر  
أعظم ساحر! المهم، آني مو غبي لهاي الدرجة، بس هواي يگولون  
آني شوية شخصيتي غريبة. بطلت اسولف للناس أفكار صفناتي،  
لأن بس يضحكون ومحد يحاول يفهمني. ما أدري الناس بيش

تفكر؟! آني هم أفكر بالعيشة مثلهم، بالشغل والاكل والشرب والزواج والجهال، بس الواحد غير لازم يفكر بأشياء ثانية بالحياة؟

بعد زيارة السيد للمكتب، طلب من عمي يجييني لبيته حتى اشتغل يمه. چنت اظن راح اشتغل مثل عمي أيام زمان، خادم بيت السيد. بس بعد وقت طويل يالله فهمت ليش اختارني السيد واهتم بيه من البداية. انطوني غرفه خاصة صغيرونه، بيها كمبيوتر وطابعة واوراق واقلام. اول شي طلبه مني السيد هو ان افتح ايميل جديد باسم، بلبل السيد. گتله (( اني اتشرف أكون البلبل مالتك!!)) هز ايده وگال ((والله يالله!!)) انوب گتله ((بس سيد ماكو ايميلات بالعربي؟!)) گال السيد (( حبيبي.. آني ليش اختاريتك غير لانك مطي.. حبيبي اعرف ماكو عربي.. اكتب الاسم بالحروف الانكليزية)) طبعا چنت اشاقه وياه بس ما فهم! فتحت ايميل وانتظرت ما اعرف شنو أسوي، ولاهو شنو شغلي! چان السيد موصي كل مستشارينه وحمائته وأصدقائه والمساعدين مايحچون وياي، وهو فقط الي يحچي وياي، ويمكن بأي وقت اطب عليه. فرحت وحسيت صرت مهم. بس ما چنت اعرف شنو اهميتي! بعد أسبوع جابلي السيد مدرس يعلمني اللغة الفارسية. خفت طبعا، أي شي أله علاقة بالدروس والتعليم يخوفني، لان چنت اظن فهمي بطيء، وما راح اتعلم! انوب جابولي مدرس إنكليزي. واخيرا مدرس باكستاني. وصار عندي جدول اسبوعي، يدرسوني لغات بغرفتي، وخصص لي السيد راتب ماچنت احلم بيه بحياتي، واشترالي سيارة. طبعا السيد چان عنده كلش هواي مساعدين يشرفون على صفحاته ب الفيس وتوتير وانستغرام. وچانت اكو ايميلات خاصة



يدزون الناس عليها اسئلتهم في القضايا الشرعية، وينشرون اجوبة السيد بموقع احباب الله كل أسبوع مرة. اما ايميل بلبل السيد على أساس چان خاص بس للمحتاجين والمساكين الي يريد السيد مساعدتهم. وعلى أساس هو سري بيني وبين السيد، لأن السيد ما يريد يسوي دعاية نفسه، ويريد الزكاة تكون بينه وبين ربه. طبعا السيد أكبر نغل، وچان مخطط لكلشي من البداية. وچان يدور على شخص مناسب، وطبعا ماكو أحسن من محسن البلبل. مطي وفقير وخوش ولد وما يسولف هواي، وعمامه ثقة، والههم تاريخ طويل بخدمة السادة!

دارت الأيام، مثل ما بگولون، وفهمني اخيرا السيد الموضوع. ايميل بلبل السيد، مخصص فقط للمعجبات. وإذا طلع الموضوع لأي واحد، راح يگطعني السيد، ويسوي لحمي تکه وكباب، مثل ما گال هو بنفسه .

اكد فد واحد راح يسأل، شلون المعجبات راح يعرفن الايميل؟! وآني سألت نفس السؤال بالبداية. بس اصبر، راح اسولف لك، مو بس على هاي، راح ازوع كلشي وخلي الي يصير يصير. واعرف هواي ناس عبالها آني اتجنى على السيد وهو ما عنده هيچ سوالف. طبعا الي اگوله، لو چان ويكليکس لو بي بي سي لو أي شخص أجنبي، يكتب ويسولف عن هذا الموضوع، چان الناس صدگت الي اگوله. بس هو العراقي هيچ، رب الشيزوفرينه! يسب ٢٤ ساعة بأمریکا واوروبا، وبنفس الوقت ما عنده غير طوبة اوربا، واخبار امريکا، وتسريباتهم وتليفوناتهم وموديلات ملابسهم، ومسللاتهم النيتفليکسية. المهم، شيفيد الحچي! المدرسين مال الإنگليزي والباکستاني والفارسي، الي

خصوصوهم الي، طبعا لان السيد چان عند معجبين ومعجبات بكل دول العالم، وچان يريد يتواصل وياهم. بس السيد ما انتظر حتى اتعلم كل هاي اللغات، وأبدي الشغل. العراقيين اول مرة، وشوية شوية أوسع شغلي، كلما تعلمت چم كلمة اجنبية.

امشي بشوراع مالو، واصفن مرات بالسيد. اظن چنت احبه، وماشفت بحياتي انسان حساس مثله ويحب الناس، والي يعرف السيد زين، يدري شكد يضحك، وهو حشاش درجة أولى. وهوواي من سوائفه الناس تحفظها مثل دارميات الشعر الشعبي. مرة وصلتني رسالة من معجبة تگول: ((حبيبي بلبل السيد.. انت عبقري.. الي يخلي شعب كامل، يأخذ كلمتين تگولهم انت بعفوية.. ويرددونهن بالشارع والبرلمان والمظاهرات والتلفزيون، هو أكبر عبقري بتاريخ العراق! حبيبي بلبل السيد، امنية وحده عندي، أخلي خدي على ايدك وابوسها.. ما اريد اگول أخلي ايدي على شفائفك الي يطلع من بيناتهن حكم واشعار ومعاني))

مثل ماگلت، السيد ذكي! تعبير (أكبر نغل) أحسن بهووي، بس يمكن يجرح مشاعر بعض الناس الي يعبدون المقدسات! السيد چان هو يختار المعجبات اول مرة بشكل عشوائي، تگدر تگول چان يمشي وره احساسه. شلون؟! تجيه طبعا تيكسات مسج على تلفونه، ويلتقي بهووي ناس شخصا، يجون يزورنه بالبيت يشكون له، وعندهم مطالب وحاجات. البنية الي يختارها السيد ويريد يجس نبضها، ينطيهها اميل بلبل السيد، حتى تتواصل وياه. والسيد صبور ما يطب عامي شامي باي وحده. وشهادة للتاريخ، السيد مستحيل چان يتواصل وية اي وحده متزوجة او ارملة او عندها أطفال. ما

يقبل! بس البنات الي بعدهن ما فتوحات، وچان طبعاً ما يقبل يلتقي بيهن. چان يستمتع بس برسائل الغزل، وچان يكتب الهن اشعار قصيرة. مرة شوية گلبيه رف على وحده، وفكر يشوفها، بس چان خايف ومتردد. بنية اسمها، فاطمة، وچانت حلوة. بديت اتواصل وياها، قصدي نتواصل آني والسيد وية البنية. چانت رسائلها كلها غزل ومحبة واعجاب، وامنيتهما الوحيدة بالحياة، ان تختلي بالسيد وتبوس أصابع رجله. بدت مرحلة النبش، حسب طلب السيد. اخذت السيارة الي اشتراها لي، ورحت لمنطقة بيت فاطمة. چانت عايشه بالشعب. تطقست وسالت عنها وعن أهلها، وبقيت اراقبها أسبوعين. ابوها رجال چير بالعمر. وامها ما تطلع من البيت ملتية تري جهال ابنها الوحيد. فاطمة عدها ٣ اخوات، وعمرها ٢٢ سنة، مخلصه اعدادية، وكاعدة بالبيت. محجة ومسوية صفحة في الفيس لمنصرة جيش احباب الله. بعد ان راقبتها، رجعت للسيد وشرحت له كل وضعها بالتفصيل الممل. قال ((اوصفلي ياها)). گلت ((لا طويلة ولا قصيرة، شوية متروسة، بيضة، صدرها چير، وتحب تشتري هواي گلادات ومحابس وخرز)). سألني السيد عن رأيي، اذا نأجر بيت ونلتقي بيها؟! طبعاً آني ما عندي راي، وطولت بصفنتي! قال السيد ((تگول راح تحل مشاكل العراق كلها بهاي صفتك؟!)) انوب قال، عوف الفكرة، خلي تولي. خليها تدز لك صور!

ومرت شهور على هذي الرنه. رسائل حب وغزل ومعجبات. وبدت الفارسية مالتى تقوى، والإنكليزي تعلمت شوية، والتركي مكسر. الى ان اجه يوم وطلعتنه بنية اسمها زينب، وغيرت كل أمور حياتي، وگلبت حياة السيد. گبل زينب، اكو بنية گحبة دزت اغنية ( غير السيد مايبه لوله). ما ردت السيد يسمعها، بس هو

چان مشدد، ان احچي له كلشي! خرب من الضحك من سمع الاغنية. وبعدها صار بيناته كلمة سر. من يدز لي السيد تيكست مسج مكتوب بيه (مايه لولة) يعني يريدني ارواح له، بخصوص ايميل المعجبات.

يوم من الأيام دزت البنية الي اسمها زينب ايميل صوتي. وبقت تتواصل بنفس الطريقة، تسجل صوتها وتدزه بالايميل، وابدأ ما تكتب. زينب هاي، تشتغل مترجمة في السفارة الإيرانية. مرة السفير جاي زيارة للسيد، وجايب وياه زينب. من سمعت صوتها اول مره، شعر ايدي وگف! چانت تحچي بلهجتته العراقية، بس بطريقة الايرانيين. چانت تلحن الكلمات، وتنغم الجمل، وتموع الروح بصوتها! وچانت كلش رقيقة وجنسية، وبصراحة ضربت جلق أكثر من مرة على صوتها، وهي تسولف عن الحب والهيام والاشتياق ونار العشگ، خاصة من تگول، أحس نار تشب بكل جسمي من أفکر ب بلبل السيد. زينب عايشة وكبرانه بايران. أهلها چانو مسفرين، رجعو للعراق بعد سقوط صدام. مطلقة وعدها بنية عمرها ٥ سنوات. وتحچي عراقي وفارسي وانكليزي وفرنسي. من البداية حسيت السيد كلش مهتم بيها. وچنها ماخذه عقله وتفكيره. كل ساعة يدز لي تيكست مسج (ماي لوله!) ارواح له، ويسألني اذ زينب دزت ايميل جديد لو لا. الى ان خلص صبر السيد، وطلب مني ان نسوي خطة، حتى يلتقي بيها.

اجرت بيت لمدة أسبوعين، على أساس جاي آني من المحافظات، وزوجتي مريضة تراجع على مستشفى بـ بغداد. وطبعا زينب على أساس زوجتي. چانت المشكلة هي شلون يجي السيد للبيت، مع

الموكب الجبير ماله؟! الا ان توصل السيد الى خطة، وجانت بصراحة مجازفة. غال لجماعته ومستشارينه، يريد يروح متنكر لبيت ناس فقره حتى يساعدهم وما يريد بس حماية اثنين وياه، ومحسن البلبل. طبعا صارت هوسة، ورئيس اللجنة الأمنية الي يتكفل بحمايته رفض وعارض بالبداية، بس بعدين السيد رزله، وسكت.

طلعنا بالسيارة، آني اسوق، والسيد غعد يمي، والحماية وره. چانت زينب تنتظره بالبيت الي أجرته، وچانت جايه بنتها وياها. بقو الحماية ب باب البيت، ودخلنه آني والسيد. خلصنه بسرعة إجراءات زواج المتعة، واختله بيها السيد، وبقيت آني يم بنت زينب بالمطبخ. من طلع السيد من الغرفة، چان وجه يشع نور ومبتسم، وعيونه بيهن دموع، وچنت تحسه خاشع، مثل واحد نازل عليه ملاك الوحي! وماحجه ولا كلمة وحده، لا وياي ولا وية الحماية، الطريق كله ظل ساكت.

بعد أسبوع دز عليه مرة ثانية. وطلب مني ان تأجر بيت بمنطقة ثانية، وبنفس الخطة. طبعا چان السيد متنكر. والسيد روحه تخبل، چان لابس شفقة زرغة چبيره، وملابسه تشبه مال هذول، مغنين الرب. بس هاي المرة اله شوية تصير مشكلة! وكفتنه سيطرة. وچان السيد ماخذ احتياطه طبعا، وعنده هوية مزورة اسمه بيها، عمر علي نوزاد. الشرطي بالسيطرة غال للسيد ((سبحان الله، چنك السيد القائد؟)) الشرطي الثاني غال للالول ((خاب انچب! تشبه هذا المطيرچي بالسيد)) رجعولنه هوياته، وكملنه طريقنه.

من البداية، من شافتني زينب، چانت كلش لطيفة وياي. بزيارة السيد الثانية لزينب، عفت بنتها بالمطبخ، ورحت ابول، وچان الباب

شوية مفتوح مال غرفة البلابل! چانوا مصالځ، وچانت زينب حورية، اية من الجمال، رشيقة وتقريبا بطولي، وچانت تلحس كل جسم السيد، الي چان شبه غايب عن الوعي. وانوب صعدت فوگاه، وگف زي، اتعوذت من الشيطان، بلت، ورجعت يم بنت زينب.

وبقينه على هذا الحال، يعني تقريبا گذرنا نرتب خلال شهور بس ٥ خلوات. طلب مني السيد ان ادرس له بعض الوضعيات الجنسية من مواقع النت. چان السيد، يسوي راسين، وچان يريد أكثر، بس زبه چان يحتاج وقت أطول، حتى يگوم من جديد. اشتريتله فياگره، جربها، بس ما حبها، لان صار عنده صداد قوي، وچانت تلعب نفسه.

فد يوم اجرت بيت وجبت زينب. اجت گعدت يمي، وگالت تريد تحجي وياي بموضوع كلش مهم. اعترفت لي وشرحت، شلون هي من البداية چانت معجبه كلش بيه، وبدت تحچيلي عن طولي وهدوي وصوتي الرجولي الخشن. وبقت تمده وتغزل بجمال جسمي. وگالت، بصراحة بلبل آني كلش كلش احبك. وچچتلي عن رسائلي الصوتية الها. چان السيد يرد على زينب بنفس طريقته بالايمل. يكتب اشعار غزل وحب لزينب، وچنت آني اسجلهن بصوتي، وارد على زينب. تگول، حتى من تمام وية السيد، چان صوتي يبقی براسها. قربت شفايفها من شفايفي، عرگت، وچان جسمي كله يرجف، فلتت، رحت فتحت الثلاجة وشربت مي بارد. گالت زينب، آني وحده ارملة، وصحيح معجبة بالسيد، بس وياه ما عندي اي مستقبل، وهذا زواج متعة مؤقت. انوب گالت، بلبل انت شاب وما متزوج، وحلفت (راح اصير خدامة لك اذا تتزوجني).

ماصدگت الي تگوله! هاي البنية، الي هي آية من الجمال، تحبني  
آني، محسن البلبل أبو الصفنات، الي طوله بطول النخلة وعقلة عقل  
الصخلة! بعد كلامها خلتني هاوي اباوع على نفسي بالمرابه، اول مرة  
واحد او وحده يگلي انت وسيم. وانوب تگلي شكلك سينمائي يشبه  
الممثلين، وانت كلش شكلك رجولي وهيبة. چنت مرعوب طبعاً،  
اذا السيد عرف، اکید راح يصلخ جلدي. بقت زينب تحاول ويای  
وما استسلمت، وچان تدز لي رسائل خاصة على الايميل. وحاولت  
مرة بخلوة من الخلوات، قبل ما يجي السيد، تجييني ع الطريق  
الصحيح! چانت ما جايه بنتها وياها. دخلت للحمام وطلعت من  
دون ملابس تفوح منها ريحة الشامبو، واجت وتقربت مني. محسن  
احبك كلش، گالت. چانت تحس بحالي، مدت ايدها ولزمت زي الي  
چان واگف ومستعد مثل مدفع الافطار. عفتها وانهمزت، وطلعت  
من البيت حتى اروح اجيب السيد. بقيت ايام داخ بهاي السالفة،  
وبديت شوية شوية، أحب زينب، سلام الله على جسمها وعيونها  
وريحتها وصدرها.

يوم من الأيام. چان السيد بغرفتي وچنه قافلین الباب عليه.  
وچنت اشرح له وضعيه مال جنس شفتها بمواقع السكس، تگدر  
تطبقها على حافة القنفة، ومن وره على الگدام. وچان السيد  
مستمع ويضحك من طريقتي واني أمثل له، شلون انيچ بحافة  
القنفة. بصراحة مات من الضحك! واني چنت اتخيل، فعلا مخلي  
ايدي على طيز زينب من ورة، وادفع بزبي. خفت اگوم، والسيد  
ينتبه!

آني مطي وارعن ومخربط، وعبالي كلشي ينحجي بهاي الدنيا.  
بعد أسبوعين چنت خايف، وقررت ان اعترف بكلشي للسيد. وهو

رجال يفتهم وعنده حكمة واكيد راح يتفهم الوضع، ويلگه حل عقلائي للموضوع. ما ادري شلون لو ليش تخيلت السيد راح يگلي (ماكو مشكلة بلبل، تزوجها واني راح اعوف زينب لحالها) اكيد هاي چانت امنيتي الي بداخلي، و چنت اتخيل واتوهم، واني زمال اصلي!

طبعا بالحسين أبو عبد الله ما چان قصدي انطي بزيب، بس ولائي للسيد، ما خلاني اسكت وأضم السالفة. گتله سيد، زينب معجبه، واني ما اريد اضم عليك. لان هي بصراحة، تگول تحبني! ما تتخيل شنو صار بالسيد من سمع الي اگوله. اشتعلت الغيره براسه، وتخبل! طلب مني اول شي ان اسولفله عن كل الي صار بيناتنا آني وزيب. حلفت له بروح جده بان كلشي ما صار، واني ما طاخ زينب بأصبعي. بس السيد چان ما يسمع بس صوت الغيرة الي بداخله. گلي، يعني كل هاي الشهور چنت تنام وياها يا گواد! لا ورب الراقصات، اليوم راح تكون نهايتك! حلفت له ونزلت وبست رجله وترجيته يصدگني (والحسين ماصار كلشي!) وبقيت احلف له وابوس برجله واتوسل بيه. ظل يصيح علي ويفشر، وشبعت اهانات وكفخات وچلايق. گلي، انتظر بالغرفة. رجع وييده صوندة حمره، وگلي انزع ملابسك مثل ما خلقتك الله. حسيت بيه نصدم من شاف زي الطويل، وتخبل بالزايد، وانوب موتني، ضرب وكفخات وجلد ورفسات.

بعد چم يوم دز علي، وچان شوية هادي. طلب مني ان اسد ايميل البلبل، وأبطل من شغلي، وارجع اشتغل بمكتب عمي القيادي. ونبهني أكثر من مرة، بان أنسى كل الي صار، واذا طلعت كلمة وحدة بخصوص ايميل بلبل السيد، راح اشوف جهنم بعيوني!

قبل ما اسد الايميل تواصلت شوية وية زينب. گالت لي السيد



قطع علاقته بيها. وگالت هاي فرصة، ونگدر هسه نتزوج. واذا  
چان السيد نغل، زينب چانت جنية. اخر ايميل دزت لي صورتها  
نص مصلخه بالفراش، ومخليه مجال بصفها، وتگول، مكانك خالي،  
وفراش الحب دافي، وينتظرك! اخيرا سديت الايميل، وبطلت اتواصل  
وياها، ورجعت لمكتب جيش احباب الله يم عمي القيادي.

وبقيت شهور احلم كل ليلة، بزینب، سلام الله عليها!



## صفات البلب

بالعرس مالتى تعرفت على صادق حسن، وهو ابن صديق عمى طاهر، ويشغل بإذاعة احباب الله. ماچنت مقتنع بالزواج، وگلت لعمى، خلى اشتغل اول مرة شغلة بيها خير بعدين اتزوج، وآنى واختى زهرة چنه بعدنه عايشين بيت خالى. عمى گال، اولاد خالك صارو كبار، واختك راح يجي يوم وتصير قسمتها وتزوج، لازم تكون عائلة والعمر يخلص بسرعة. انوب گال، انت هسه جندي من جنود جيش احباب الله، والشغل أسهل منه ماكو! ساعدني عمى بايجار نص قطعته. اختى زهرة ما قبلت تجي وياي لبيتي الجديد، وگالت آنى متعودة اعيش بيت خالى. عفتها براحتها، وگتلهها، هله بيچ بأي وقت! عمى طاهر لگالي بنفسه زوجتي كريمة. خوش بنية فقيرة من قطاعنه، مخلصه ابتدائية وعدها ست اخوة كلهم بجيش احباب الله. واذا انى مخلص حياقي صفات، كريمة مخلصتها حسرات. بس تتحسر حتى اذا ماكو مشكلة. ما اعرف عبالك صدرها مشكل على الحسرات بسبب مرض بالرئة مالتها. وحتى هي ما تعرف ليش تتحسر ٢٤ ساعة. تتحسر من ناكل، وتتحسر من تغسل بالحمام، وتتحسر من نام سوية، وتتحسر من تكون فرحانة، وتتحسر من زعلانة. كريمة تگول يمكن وراثه من أمها. چان موضوع الشغل قالقني كلش، لان ما معقوله أبقي گاعد بمكتب عمى طاهر، لا شغل وعمل، بس يأمرن عليه. روح لفلان، گله عدنه اجتماع. روح للشعلة لفاتحة فلان، وسلمنه على

الجماعة وسوي الواجب. روح ودي هاي المنشورات للحبيبية. اطلع بالمظاهرة، وزع مي.

صادق حسن، صديقي الجديد، خريج كلية الفنون الجميلة، ويشغل مخرج بالإذاعة. فد يوم چنه بالكهوه، طبعا هو مدمن ارگيلة، آني ما أدخن وحتى ريحة الجكاير تلعب نفسي منها. چنه نلعب دومنه، واني كلش أحبها هي والطوالي، لان بيهن خوش صفنات! انتبه صادق، وگلي انته كلش مصدگ باللعب وتصفن هواي، عبالك نلعب شطرنج. شرحت له! گتله آني ما صافن باللعبة. الصفنات هوايتي، لو تگدر تگول إعاقه، شلون واحد عنده إعاقه بالولادة، صفناتي هي مشكلتي بالحياة من چنت جاهل صغیر. ضحك صادق، وأصر يعرف على شنو چنت صافن. گتله خاف تگول عليه ملحد مثل ذوله جماعتنا، بس تسالك سؤال، يشبعونك مسبات وتكفير وتخوين. وعدي صادق راح يسمعني ويحاول يفهمني. گلت: ((الله مو قادر على كل شيء؟! ليش بس الدول الإسلامية حالها خراب وحروب وامراض وتخلف، ليش ما يدخل رب العالمين ويساعده؟! يعني احنه نعبده ونحب نبيه ونحترم ال البيت ونبچي ونلطم عليهم ونرفع راياتهم ونحلف بيهم ونتبرک بيهم وحالنا هيچ.. ليش الله ما يحبنه مثل ما نعبه.. ليش الدول مثلا باوربا كفار يشربون كحول ويأكلون خنزير ويعيشون سوية من دون زواج وكلشي يسوون، وحياتهم زينة وچنهم عايشين بالجنة.. يعني لو الله يحسن وضعه ويثبت لدول الكفار الإسلام هو دين الحق.. حتى العالم كله يهتدي لدين محمد ويتبع ال البيت..)). صادق گال ((اکید عند الله حكمه وهذا امتحان)) گلت ((يعني یمتحن المطيعين الي يحبونه وعاييف الي يسوون كل المحرمات يعيشون حياة

حلوة؟!)) غال صادق ((هذا موضوع طويل واكو ناس اختصاصه امور الدين واكيد ممكن يجاوبنك)) اعرف، گلت، وآني تره بس اسأل! تره مو ملحد، والحسين أبو عبد الله.

بعد چم يوم اتصل بيه صادق وگال، عنده كلش شغله مهمة ويابي. رحت شفته. سولفلي شلون هو متضايق وضايح من شغل البرامج مال إذاعة احباب الله، والسبب، لان برامجهم، مثل مايگول، كلش جادة أكثر من اللازم، والناس بعد مالها خلگ جديات. وگال صادق، هسه اكو الفيس والنيثفليكس واليوتيوب والاف القنوات. والبرامج الدينية كلش قديمة، ومنو اليوم يسمع اذاعة دينية تكرر المواضيع نفسها، يراد شوية تجديد! لهذا طلعت براسه فكرة جديدة من وحي (صفناتي) الي حچيتله عنها بذاك اليوم. گلي انت طريقتك بالكلام بسيطة وكلش حلوة وتضحك. لهذا صادق اجته فكرة برنامج اسمه (صفنات البلبل). آني أقدمه، وهو عليه الاعداد والإخراج. گتله، صادق آني شجانبني على هاي الشغلة! گلي ((مالك علاقة، أولا انت صوتك كلش حلو واذاعي، صدگني! وطريقتك بالكلام راح الناس اتحبها. واكو أشياء بسيطة بالشغل، تقنيات ومن هاي السوالف، آني راح ادربك واعلمك عليها.)) گتله (( اوكي! بس انطيني وقت أفكر!))

استشاريت زوجتي كريمة، تحسرت وگالت (والله ما أدري، بكيفك بلبل!). خابرت اختي زهرة وحچيت لها، ضحكت وگالت ((يا! تصير مذيح بالراديو.. وانت شلون راح تدبر هاي الشغلة.. انت ماتسولف.. ومخلص حياتك بس صفنات)) گتله، خلف الله عليچ، لا انت ولا كريمة تسون واهس! خابرت صادق، وگتله يعني

آني مقتنع، بس تعال جيب الي يقنع عمي طاهر. صادق كال، عوف  
عمك علي، وراح يفتخر بيك ويفرح، بعد ان ينجح البرنامج.

والله صارت صدغ، ورحت للإذاعة، وبده صادق يعلمني، شلون  
احجي بالممايكروفن، وشلون اسمعه من ينطيني توجيهات. وهواي  
تفاصيل ثانية، ودخت اول مرة! وبعد ما شوية تمرنت وصرت اعرف  
بعض الامور، گعدنه آني وصادق، نختار المواضيع مال الحلقات.  
طلب مني ان أتذكر بعض صفناي، حتى يشوف ياهي منهن ترهم  
للبرنامج. بيدي برنامج (صفنات البلبل) بفكرة صفنه، احجي بكل  
حرية، حسب كلام صادق، وبعدين نفتح خطوط الاتصال مباشر  
بالبرنامج، والناس تنطوي رأبها بالموضوع، وتحجي عن صفاناتها،  
وحيرتها بهاي الدنيا.

سجل صادق كم صفنه من صفناي. وحده چانت عن زواج  
المتعة. وصفنة عن المثل اليگول الي مينوش العنب يگول حامض.  
وصفنه عن الناس الي مخلصه حياتها بس تشكي من احوالها ومن  
جيرانها ومن العراقيين كلهم، وهم نفسهم كلشي مايسوون بحياتهم.  
وصفنة عن عركات الفيس، وشلون تبدي العركة بالقنادر بالبرلمان  
أولا، وبعدين تستمر العركة بالتلفزيون، بعد ان يخلي اله مقدمي  
البرامج شوية بهارات، الي ان تنتهي المشكلة فشار ومسبات وبلوكات  
يم الفيسبكويين والتويتريين.

المهم توكلنا على الله وال البيت وبيدنا الحلقة الأولى.

أعزائي المستمعين:

مساء الخير. اسمي محسن البلبل، أبو الصفنات. وهاي هي  
الحلقة الأولى من برنامج (صفنات البلبل). ما أحب المقدمات.

وأحب ادخل بالسالفة رأساً! قبل كم يوم جنت بالسوگ. رايح اشترى سمج وطرشي. اشترت خوش سمجة بنية. رجعت للبيت ولگيت زوجتي كريمة تباع على برنامج سياسي يتعاركون بيه حزبين، كل واحد يدافع عن طائفته. گتلهها، كريمة شني السالفة؟ گالت، والله ما أدري بلبل، كلشي ما افتهم. انوب سألتني، اگلك عود شنو الفرق تكون شيعي عراقي لو سني عراقي؟ گتلهها، اكو ناس تعيش على هاي السالفة. يعني شلون جيرانا عايش على بيع الطليان بالعلوة، هذولة عايشين على بيع الطائفية. ضحكت وگالت ((يا.. چا هي الطائفية طليان!)). گعدت كريمة بالحوش، تنظف السمجة، وگعدت آني گبالها اسوي زلاطة. أحب اساعد بالأكل دائماً. من فتحت كريمة بطن السمجة وطلعت مصارينها، طببت بصفنة طويلة، فکرت بمصارينني، وانوب بديت أفکر بكل أعضاء جسمي الي بداخلي والي ما اگدر طبعاً اشوفهن! ما أدري ليش تخيلت الكبد والبنكرياس والگلب والمعدة، حيوانات اليفة عايشه جوای. انوب طلع سؤال براسي، عود ليش احنه ما نفکر هوای بالي ب داخلنا ونفکر بس بالي نشوفه بره نفسنه؟! ليش ما نحاول نفهم هاي الحيوانات ونحبها ونحاول نسوي علاقة وياها، وهي أقرب الأشياء منه، او تگدر تگول هي احنه نفسنه. يعني الواحد من عدنه من يتمرض، ويگله الطبيب مثلاً عندك مشكلة بالكلية لو بالبنكرياس، ويشرحله شوية تأثيرات طبيعة حياة الانسان عليهم، راسن نروح للنت وندور معلومات أكثر، ونحاول نفهم شنو تأثير الاكل والجگاير والدهون والسكر على صحته وعلى حياة هاي الكائنات. أدري يمكن كلمة كائنات لو أعضاء أفضل من كلمة حيوانات! بس حبيت آني فکرة، حديقة الحيوانات الصغيرة الي بداخلي، چنه عنوان

مسلسل لو رواية! اكلنه السمجة، وشربت تلت استكانات چاي،  
ومنا آني وكريمة على هوة المبردة. من يوم السمجة، تگدر تگول  
دخلت بعلاقة حب وية هاي الحيوانات الي بداخلي. وصل بيه  
الحد من التفكير، بان نزلت دمعتي من فكرت بان احنه البشر  
نعيش ونموت من دون ان نشوف أعضاء جسمنه. يعني على غولة  
المثقفين بالتلفزيون، هاي مفارقة، لازم اله تكون مريض ويبدلون  
مثلا گلبك، وراح تكون محظوظ من تفتح عيونك بالمستشفى وترجع  
للحياة، والطبيب يجيب گلبك القديم وتشوفه وتلتقي بيه لأول  
مرة بحياتك. وبقيت اقرا في النت وادور معلومات، وبده يزيد  
حبي وعشقي لكلشي جواي! يعني ماچنت مثلا اعرف، الرئة هي  
العضو الوحيد بجسم الانسان الي يمكن ان تطفو فوگ المي. تعجبت،  
وحلمت بنومي، برئة طافية على المي، واني گاعد اصيد بسنارة،  
وطلعي طحال. وزاد حبي بالحيوانات الاليفة الي بداخلي، وبديت  
اهتم بطريقة اكلي، لان ما معقولة اقسي بالأكل على هاي الكائنات  
الجميلة والعظمية، والله صدگوئي! وبقيت بعلاقة غرام وية نفسي  
أيام طويلة، وعفت العالم الي داير ما دايري. ليش ما انفكر ونعتني  
كل يوم، بالحياة الي تحركنه، ومخيلتنه بهاي الدنيا عايشين. يعني  
معقولة واحد يفكر بالسياسة لو بالطائفية أكثر ما يفكر بعضو  
حي بجسمه، ومخلي عايش!؟

من خلصت حچي بالموضوع، وفتحنه المجال للاتصالات. اشتغلت  
التلفونات على برنامج صفنات البلبل. وثاني يوم احترگت الدنيا  
بمواقع التواصل. تعليقات اشكال وأنواع. تعليقات بيها نصب  
وضحك، وناس تشكرنه على هاي المواضيع المهمة، وناس تسبته  
وتسب تفاهتنه. ضجت آني كلش من شفت تقليد بعضهم ونصبهم



على فكرة صفتي. واحد يگول، إذاعة احباب الله عدهم مقدم برنامج يگول، لازم تضرب جلق على البنكارياس مالتك. وثاني يگول، شلون تتزوج زواج متعة بالكلية مالتك. وهاشتاك احباب الله وعشق الطحال. وتعرفون وتتخلون تحشيش العراقيين.

ثاني يوم من جيت للإذاعة، چنت مستحي من صادق. وفكرت، اكياد الإدارة مال الإذاعة هسه مرزلته وراح تطردنه. بس صادق استقبلني مبتسم وبالأحضان. ومن چيئته عن التعليقات الموزينة. گلي صادق، بلبل انت تحچي صدگ؟! لعد هي شلون تصير الطشة، هي هاي التعليقات دلالة على نجاح ساحق للبرنامج، وراح تخلي الناس تنتظر الحلقة الثانية وهم على نار. لازم انحضر حلقة قوية. مو گتلك انت عندك موهبة بالفطرة، ومبدع حقيقي، والحسين أبو عبدالله انت فنان، وصدگ بلبل! احتفلنه، ورحنه اكلنه بمطعم خوش باجة، وبدينه نحضر موضوع الحلقة الثانية.

ومشه والله البرنامج، وبده ينجح وصار عليه نقاش بمواقح التواصل الاجتماعي والتلفزيون، وبدت بعض البرامج تسوي لقاءات وياي، وصرت كلش مشهور بعد ٦ حلقات. بس بعد الحلقة ١٣ ما أدري، شوية حسينه بان البرنامج قل جمهوره، يمكن الصفات صارن موزينات! بس بصراحة آني حسيت بان صادق صار شوية طماع، وچان يريد جمهور أكبر. فد يوم گعدنه وسولفنه. گلي صادق، لازم شوية نسوي حلقات جريئة وصادمة بيها مشاكل، حتى النقاش يكبر بين الناس. گال اريد صدمات وضجة، وطلب مني ان أفكر بصفحة تسوي مشكلة بين العلمانيين والإسلاميين. وگال، راح نگول للمستمعين انت راح تأخذ إجازة مرضية أسبوع. وراح يصير تشويق

والناس تنتظرك. وروح انت فكر براحتك، وأريدك يا محسن المبدع،  
يا أحلى بلبل، تطلعي بصفة حلوة وقوية!

انطوني والله الاجازة، ورحت حتى أفكر. آني من صغير أحب  
المشي. بعد صلاة الجمعة، مشيت. گلت خلي امشي مناه لمن  
اتعب، بعدين اگعد ب گهوة واستراح. صفت بالسياسيين، المتدينين  
والعلمانيين. اثنينهم يگولون، هم يحبون العراق ويريدون مصلحته.  
والناس تعبت منهم وملت، وتگول بس حچي وكلهم حرامية.  
المتدينين يگولون (عود هم شنو العلمانيين، صدام مو چان علماني  
وچان سفاح.) والعلمانيين يگولون (صدام ديكتاتور وسفاح وما يمثل  
العلمانية والمدنية) ويگولون ردهم بسؤال (وهم شنو الإسلاميين؟  
هم نفسهم داعش وطلبان وزرقاي وسعودية وجلد وشريعة  
وتخلف.) والإسلاميين يگولون(هذول مايمثلون الإسلام الحقيقي!)  
زين عوفك من عركاتهم، الي ماتخلص! شنو المشتركات بيناتهم. اكيد  
كلهم بشر، يريدون يعيشون بسعادة يربون أطفالهم ويعيشون  
ب بلد محترم بيه نظام صحي وتعليمي جيد، على الأقل مثل  
جيرانه الي عدهم نפט. زين ليش مايتفقون، اذا اثنينهم يريدون  
مصلحة العراق والناس؟ كل واحد يتنازل شوية من تعصبه الديني  
لو العلماني، ويبطلون بوگ ونفاق!

حسيت صفناي تغيرت من بديت اشتغل بالإذاعة. قبل چانت  
صفناي من دون خطة. هيچ، أشياء شخصية أفكر بيها بحرية.  
بس هسه صار يدخل بصفناي صادق المخرج، وصارت شوية بيها  
مبالغة ومو طبيعة. اقصد صفناي چانت خاصة، هسه صرت ارهم  
صفناي على المشاكل العامة. بدلت الخطة واخذت تاكسي ورحت

لباب المعظم. مشيت بشارع الرشيد، الى ان دخلت بشارع المتنبي. جان ازدحام كلش، وچنت أحب هذا الشارع، وأحس برهبة بيه. ما چنت بهذا الوقت اقره كتب هواي. الشارع كلش حلو، وعبالك سوگ مال بس مثقفين. تفرجت على عناوين الكتب، وطفرت براسي لعبة. گلت خلي اقره عناوين الكتب ب البسطيات، والعنوان الي يعجبني اصفن بيه، بدل الصفة مالت صادق، عن العلمانيين والمتدينين. ظليت اروح واجي بالشارع واقره بالعناوين، وماكو شي، الوحي مانزل عليه!

شفت ولد صغير يمكن عمره ١٢ سنة چان شايل كونية تگیله بيها كتب، ومرات يسحل بيها سحل، وچان يدور على مكان يبسط بيهن. الشارع چان تقريبا كلش مزدحم. گتله ليش ماتبسط بشارع الرشيد والناس الجايه على المتنبي تمر عليك وتشوف كتبك؟! گلي ((ماعرف عمو!!)) گتله خلي اساعدك، شلت الكونية على ظهري، وگتله، تعال خلي نشوفلنه مكان. لگيت خوش مكان بصف عربانة چاي بيه ولد شاب، مبین خوش ولد. فرشنه الكتب، طلبت چايين، وگعدت آني والصغرون يم البسطية. سألته ((منين جبت هاي الكتب عمو؟!)). گال ((الكتب مال ابوي)) ((وين ابوك حبيبي؟!)). گال ((كتلوه قبل شهر)). وسولفلي شوية ... مغتالة ابوه جهة معينة! لان ابوه صحفي، وفد مرة مستضيفنه بقناة عراقية، وحاجي ومنتقد الفساد والطائفية. يعني هسه قابل مفجر مفخخة لو إرهابي لو بايگ فلوس الناس؟! لك والله مصيبة هذا العراق! خطية اهل الوليد، ابن المغدور، گاعدين ايجار، وهو الولد الوحيد لامه وعنده ٥ خوات بنات، وأمه بيه سكر وتعبانة. گتله ((شنو اسم ابوك حبيبي؟!)). گال ((سامي المهدي)). ردت اساعده،

فاشترت كتاب منه عامي شامي، وانطيته شوية فلوس زايد. رح ت  
گعدت بمقهى ام كلثوم بالرشييد. ودورت على اسم سامي المهدي في  
النت. ناس تگول الارهابين كاتلينه، وناس تگول المليشيات، واكو  
جماعة يگولون (يعود هي شغلة شرف ونسوان!) . انقهرت على  
هذا الصحفي، شفت فيديو مقابلة وياه، مبین خوش ولد ويفتهم.  
يعني هذول الي مابگلوبهم رحمه، من يكتلون مايفكرون شنو  
رايح يصير باهله وبجهاله. يعني انت من تكتل واحد، تكتل وياه  
عائلته كلها. فتحت الكتاب الي اشترتته، وچان عنوانه، فنتازيا الواقع.  
قریت، ما افتمت هواي منه. سدیت الكتاب وخابرت صادق. گتله  
شنو معنی فنتازيا؟! ضحك وگلي، بس لاتگول صفتك الجديدة  
على الفنتازيا، صاير مثقف ببل؟! وانوب شرح لي صادق، وفهمت  
شوية. يعني الفنتازيا تقريبا حسب ما فهمت، هي الأشياء الي مو  
مألوفة او اغرب من الواقع. طلعت صفنه براسي بعنوان (الواقع  
اغرب من الفنتازيا).

#### أعزائي المستمعين:

اليوم اريد احچي عن الواقع الي اغرب من الفنتازيا. اعرف راح  
تضحكون وتگولون محسن مو من عادته يتفلسف عليه ويصير  
مثقف. اريد احچيلكم قصة ولد شایل گونية كتب على ظهره. اريد  
احچي لكم شلون الظلم يخلي الحياة تصير اغرب من الفنتازيا.  
اكو صحفي اسمه سامي المهدي كاتلينه جماعة، ماتعرف منو؟! لا  
تحقيق ولاهم يحزنون! (دأما القاتل العراقي مجهول، بس الضحية  
معروفة) ممكن تصير هاي الفكرة، مسلسل من من ألف ليلة

وليلة. عزيزي المستمع، حبيبي.. بس تخيل وياي الصورة من جديد، ولد شاييل غونية كتب ابوه المذبوح على ظهره. يعني ولد شاييل جرمتكم على ظهره. لو تگدر تگول طفل شاييل العلم والمعرفة المذبوحة على ظهره. اذا كلمن يحچي، تكتلونه؟ راح تسون الشعب كله اخرس، وبدل مايكون المثل، الأعور في بلد العميان ملك، يصير، اليحچي في بلد الخرسان ملك. وتبقون بس انتم تحچون باسم الدين والمذهب والجهاد والنضال، وتتعدون على الناس. بشرفكم اصفنو! مو الاغرب من الواقع، ان يعيش المتخلف والجاهل، والي كل الي يگدر عليه يشيل سلاح، ويموت الانسان الي تعب على نفسه وقره ودرس ويريد الخير الناسه ولأهله؟! مو الغريب ان يعيش الحرامي مرتاح، ويعيش الشريف جوعان. مو الغريب اغنى بلد بالعالم بالنفط، يجدون اطفاله بالشوارع. مو الغريب تتحرر من سجن الديكتاتور علمود تدخل سجن الطائفية والمليشيات. من اصفن واگول ليش؟ وين المشكلة؟ ارجع واگول شلون ممكن تفهم، ومشاكله صارت اغرب من الخيال، وما تنفهم!! يعني نلاصت، وصارت حياتنا فنتازيا، مره وحشية ومره تبچي، ومرات تضحك، ومرات اغرب من الخيال!

واسترسلت بالحچي بالبرنامج، وچنت أحس مثل المسحور، عبالك چان شخص ثاني يحچي بداخلي. ومن خلصت، اشتغلت الاتصالات! اكو هواي شكروني على كلامي، وبعضهم سبني، واحد هددني مباشر على الهوه! ومن خلص البرنامج چان وجه صادق مگلوب، وچان كلش منزعج وگال ((بلبل هاي شسويت؟ رحنت كلش زايد.. والله يستر.. خلي نشوف شنو راح يصير!!))

رجعت للبيت، وچنت شوية خايف. دخلت للفييس، وشف  
هواي ناس صايره وياي، قصدي وية موضوع صفتي وغبابة  
القتل والطائفية وحياتنا. اكو ناس مسجلين الحلقة، ومنزليها على  
اليوتيوب. واحد كاتب بالفييس، البلبل أشرف من كل البرلمانين. وثاني  
يگول، محسن البلبل لازم يصير رئيس وزراء، بلكت يصفن بالعراق  
ويلگانه حل ويخلصنه. وصارت مشاعر الناس على صفات البلبل،  
لايكات وگلوب حب، وجوه تيجي، ووجوه تضحك، ووجه صايرة  
حمرة مثل الطماسة من العصبية.

ما أحب انام ملباسي. طبيت مصلخ للفراش، وچنت دائما اگل  
لكريمة تسوي مثلي. بس چانت تستحي. الى ان وافقت اخيرا تنام  
بس بلباسها. چانت كريمة تشوخر، وچنت لازم حلمة صدرها اليسره  
وصافن بصدرها الجبير. تخيلت نفسي قزم، بگد نيلز. اتزحلگ على  
صدر كريمة. والصبح اصعد على ظهر وزة، واهاجر. اشوف بحيرات  
وغابات وبشر، واسمع قصص اغرب من الخيال.

ثاني يوم. دز عينه، أي وصادق، الحجبي مدير إذاعة احباب الله.  
رزلنه رزالة قوية، واله شوية يگوم ويشبعنه چلاليق. طردنه من  
الشغل. وحلف ((والحسين أبو عبد الله لو ما اهلکم خوش ناس..  
چان هسه صلخت جلدکم صلخ.. يالله.. بره.. زمايل!!))

رجعت لمكتب احباب الله، وحصلت خوش رزالة ثانية من عمي  
طاهر. وبعد ۳ أشهر، خابرنی صادق من تركيا، وگلي، راح اعبر البحر  
لليونان، وانعل أبو العراق لابوه الي يحبه. دير بالك على نفسك  
بلبل من فنتازيا احباب الله! ضحکنا، وتمنيت له ان يوصل بالسلامة.

## طيارة البلب

قبل ما تبدي عمليات تحرير الموصل، التحقت بالحشد الشعبي. جيش احباب الله تقسم الى سرايا. آني خلوني بسرايا الحمام، الي اختصاصها التحكم بالطيارات المسيرة ومهمتها العمليات الاستخبارية والرصد والاستطلاع. تدربت شهرين وية مجموعة من المجاهدين على (طيورنا) ومثل ما چان مجاهد صديق، الله يرحمه استشهد، يگول (احنه هسه مطيرجية، وطيورنا اشكال وأنواع من هاي الدرور).

الطيارات المسيرة الي عدنه چانن نوعين: طيارات مسيرة حرارية، وطيارات مسيرة نهارية. آني چان عندي وحده نهارية. ممكن تطير مسافة ٤ كيلوات، والارتفاع آني چنت اتحكم بيه، ويوصل الي ١٠٠ متر او ١٢٠ متر، حسب الظروف.

چانت كريمة حامل خطية من التحقت بالحشد. اجت اختي زهرة لبيتنه حتى تبقى يها. توسلت كريمة بعمي ان ابقه بالمكتب وما اروح للموصل. بصراحة آني هم چنت خايف. هاي حرب وموت ومو لعب. چنت كلش خايف من ان يجيني طفل ويصير يتيم، ويعيش حياة اليتيم والحرمان، وتتكسر مصيبي ومصيبة اختي زهرة! بس ما چان اگو حل ثاني، خاصة بعد فتوة السيستاني. وإذا احنه ما نطلع ندافع عن العراق والمذهب وشرفنه، چا منو راح يوغف بوجه هذول الدواعش التكفيرين. الله ينتقم من الي تسبب بدخول

داعش وخراب البلد. المهم، صارت عندي صداقات جديدة بسرايا الحمام. وأكثر واحد چنت احبه هو علي أبو القاسم، خوش زلمة من الناصرية، ويموت من الضحك، وصوته كلش حلو خاصة من يغني الطور الجنوبي. وچان اكو شي مشترك مهم بيناتنه، هو الصفنات، الي حاولت اقلل منه، لأن هاي حرب، وشغلي يحتاج تركيز. بس صفنات أبو القاسم چانت شعرية، واكثرها على جمال النسوان، وأكثر شي على صدورهن. تگدر تگول چان مدمن على التغزل بالصدور، وحافظ كل اشعار نزار قباني الي بيه كلمة (نهد). چان يحب يقره شعر شعبي وروايات. وهو الي گلي بان موالیدی سنة ۱۹۸۴ هي عنوان رواية كلش مشهورة لكاتب انكليزي اسمه، جورج اوريل، ومن كتابه اجت فكرة الأخ الجبير، الي يراقب ويتحكم بكل شي. حچالي شوية عن الرواية. عن الزعيم الغامض، العليم بكل شي، والي يعرف كل تفاصيل حياة الناس. واذكر أبو القاسم چان حافظ هواي اقتباسات من الرواية، واحد منها يگول: ((السياسيون في العالم كالقروء في الغابة.. إذا تشاجروا أفسدوا الزرع، وإذا تصالحوأ أكلوا المحصول)). اذكر بيومها سالت أبو القاسم عن اللغة العربية الفصحى ((ليش ما ندرس بالهجته العراقية، ونقره روايات ونتعلم! ليش مجلبين بالفصحى، وهي لغة مسلسلات دينية قديمة وصعبة، لا الطبيب ولا المهندس والعالم يگدر يحجي بيه، مو صحيح؟!)) گال أبو القاسم ((صحيح! وحتى الكتاب والاعلامين عدهم كلش هواي اخطاء. احنه خالصانين من هاي الدوخة بالشعر الشعبي، محد يحاسبنه، بس اذا روائي كتب باللهجة، راح يستلمونه حراس الفصحى. وسولف لى أبو القاسم تفاصيل هواي. گلي، اذا تنتبه اثنین يريدون يحرسون



اللغة الفصحى، القومية والإسلامية والمتعصبين. شوف داعش،  
من يذبحون واحد، يحچون بالفصحى!!)

بالليل، ورابي على المخدة، اخذتلي صفنه طويلة بحچي أبو  
قاسم عن اللغة العربية. يعني كل الشعوب تدرس لغتها الام. واحنه  
من نبدي ندرس في الابتدائية العربية، تصير الفصحى مثل لغة  
اجنبية مو لغة ام. الكلوب مثلا بلغة امي، يصير مصباح، والمليز  
يصير طاولة، والاستكان يصير قدح، والبنكة تصير مروحة، والچربايه  
تصير سرير، چا شلون الفصحى لغة ام؟! فهمت من أبو القاسم،  
من يگول اذا كتبه بالعامية الكتب، مراح العرب يفهمون بعضهم.  
هسه على أساس العرب فاهمين الواحد ع الثاني! شو كل واحد  
يحچي لهجته، واحد يكره الثاني. وحتى الرؤساء سطرين بالفصحى  
ما مدبرينها. بعدين، العرب اذا يريدون يفهمون بعضهم ويگولون  
اخوة، ليش ما يتعلمون لهجات بعضهم ويخلصون من المشكلة.  
يعني الواحد عنده استعداد يتعلم إنكليزي لو فرنسي لو روسي  
لو حتى صيني، بس ما عنده استعداد يتعلم مغربي لو سوري،  
وهي بالنهاية لغة عربية، شوية تركيز تتعلمها. غفيت وقصفتي  
كابوس! چنت بقاعة متروسة كتاب ونقاد وشعراء، وچانوا كلهم  
مغنتبين ويدخنون كلهم سوية، والقاعة متروسة دخان وبالگوة  
الواحد يشوف الثاني لو يگدر يتنفس. وچان آني بالحلم صاير كاتب،  
وچنت لازم اقره من كتابي الجديد، الي كاتبه بالعامية. وأول ما قریت  
اول سطر من روايتي ((فد يوم من الايام چان اكو فد واحد گاعد  
على نهر دجلة صافن بالمقولة المعروفة، الحياة طرطرة الي مايموت  
بالسيف يموت بالقنطرة) وبعد ما كملت، وصلنتي اول قنطرة بالحلم  
من السرة الأول، وبعدين صارت القنادر عبالك هجوم مال جراد.

صارت هوسه، ودخان الجگاير صار كلش هوای، فزیت وگعدت من النوم. لگیت أبو القاسم بصفی یشوخر، وفاتح حلگه، تگول سمجه گاعد تختنگ.

طیبینه أكثر من معركة، وبدينه نربك الدواعش وندمر خطوطهم الدفاعية. بوحدة من المعارك اسرته داعشي. جماعته اخذوه اللاسلكي منه، وبدو يحجون وية داعشي ثاني، چان محصور بسطح بيت بمنطقة سكنية، الحشد محاصرینه. طيرت طيارتي وبيدت ادور عليه، والولد چانوا یمی يسولفون وية الداعشي باللاسلكي. گلہ أبو حيدر ((شگد راح تبقى خاتل يا جبان.. جاينك! واله نزين شاربك) گلہ الداعشي ((يول لو انت بطل تقدم بسيارة مثل جماعتنا الانغماسين.. تقدم يا جبان)) جاوبه أبو حيدر ((آني ما عندي انتحارين مثلك، لان الله محرمه، والامام علي يگول..)) قاطعه الداعشي (ظلو أنتم ظلو! الامام علي والامام الحسين.. وهم أبرياء منكم يا جهلة)) گلہ أبو حيدر ((ولك احترم نفسك.. جايك أبو حيدر ياگواد. لا تجيب طاري الامام الحسين على لسانك النگس..))

فريت طيارتي على جهة اليمين وشفيت الداعشي. چان يحچي بالجهاز بنفس الوقت وية أبو حيدر، وياه ۳ دواعش وخاتلين وره تانكي بالسطح. اجو الولد ينطون امرلمعالجته. بس شفيت بنية صغيرة تلعب توكي بسطح بيت بصف الدواعش الخاتلين. الولد گالو، هسه هاي البنية شتسوي بالسطح والدنيا محترگة؟! واحد من جماعته گال، ما تدري یمکن اهلها ميتين، منهزمين وناسينه! أبو هاشم هو الي يقرر! اتصلو على أبو هاشم، ومن دون نقاش، امر بان يتعالج الهدف فوراً. انطيت الاحداثيات. قصفو جماعتنا،

واختفت البنية بدخان الضربة. فريت الطائرة من جديد، وشفتها على السطح، ممتدة وبعد بيها حركة. طلعت روعي من القهر! تمنيت ان أبقى طياري فوق السطح، واشوف اذ اكو واحد يجي يساعد البنية، بس اجاني امر ان اتابع اذ اكو سيارات مفخخة بمدخل المنطقة.

من سيطرنا على المنطقة، لگينه سبايا ايزيديات محجوزات، ٥ بنات اعمارهن متجاوز العشرين. سولفن شمسوين بيهن الدواعش. يعني حتى الوحوش ما تگدر تسوي الي سووه بالناس، هذول الجلاب. البنية الصغيرة الي چانت بالسطح، لگوها ميتة بعد ان بقت تنزف. ابوها كاتلينه الدواعش، وامها چانت مريضة على الفراش ما تگدر تتحرك، وچانت موصيه ابنها الي عمره ست سنوات يدير باله على اخته، والولد چان يلعب بمسدس مال مي بالحمام.

اخذو جماعته معلومات من البنات الايزيديات، عن ولد اسمه فهد موجود بالمنطقة. چان يجيب للدواعش اكل، من چان يغتصبونها، وچانو يقون يغتصبونها حتى وهي مو بوعيها. الله أكبر على هاي الوحشية والجرائم، حتى صدام ماسوه الي يسوونه. لزمو جماعته فهد، وحققو وياه، وطلع متدرب ويه الدواعش. وچان جاسوس للدواعش بالمنطقة. ما أدري، بس چان يبين فقير واثول، وكلشي ما يفتهم. جماعته شبعوه كتل لان چانو يريدون معلومات أكثر من عنده. حققو وياه، وسالوه اذا چان مغتصب ايزيدية؟ حلف بالقران بان ما مشارك. بس اكو بنية من ايزيدات گالت، مرة الدواعش گالو له، تعال اغتصب وحده منهن. چان اكو

اثنين من جماعتنا مكروهين ما أحبهم، واحد اسمه الحسن أبو علي والثاني خضير. هذول طبعا من انكس خلگ الله، وماعدهم اخلاق. خضير چان مشتغل فترة يسوي وشم، وهو بصراحة خوش يرسم. فد يوم أبو الحسن مقترح فكرة على صاحبه خضير بخصوص فهد الداعشي! باليل، منزعين الولد بنطرونه، وداگين على فردة طيزة اليمنه زب، وعلى اليسره كاتبين باقي ويتمدد. طبعا الأمر مالتنا أبو ولاء، رزلهم خوش رزالة.

رحنا بقافلة جبيرة باتجاه تلعفر. چانت الدنيا غروب وصايره ترابه. ليشي يا ربي مكتوب عليه كل هاي المصايب والخوف والموت. من ولدت حتى اليوم والحروب ماتخلص. حرب وية ايران ٨ سنين. نوب جوع الحصار وذله. وحرب أهلية، ودواعش، وبعدين، وين رايحين؟ وين الخلل ياربي؟ بينه احنه العراقيين، لو بالعالم الي ما يريد العراق يصير براسه خير. زين شلون يصير براسه خير، واحنه بعدنه سني وشيعي وكوردي وتركماني ومسيحي. اذا اليوم، مثل ما جماعته يگولون، السنة باعونه للدواعش، باچر عگبه المن راح يبيعونه الاكراد. واحنه الشيعة، مو بايعين نفسه لإيران. ردت احچي الي بگلي وية أبو القاسم، بس خفت يفتن علي، ويرزلي. لان احنه الشيعة مظلومين، ولازم ناخذ حقنه ونحمي نفسنا من التكفيرين.

وصلنا قريب من تلعفر بالليل، وعسكرنا هناك، وتعشينه تمن وفاصوليه. بعدها گعدت ويه أبو القاسم. چيكنه طياراتنا. والولد جماعة الطيارات الحرارية، طيرو باليل، ورسدو المنطقة. چانت مهمته احنه، آني وأبو القاسم، تبدي اول ما يطلع ضوه الفجر.

جان أبو القاسم كلش يدخن هواي، جگارة بطيز جگارة. انطاني وحده، جربت، وضليت اگح، وبقه هو يضحك. گتله، بحياتي ما شارب ولا مدخن. گال أبو القاسم، آني گبل چنت اشرب عرگ بس بطلت هسه. اعترفت له آني وگتله، چنت فترة اخذ حبوب ارتين، من چنت ابيع بسوگ مريدي. گال احچيلي، شچنت تحس؟ حاولت الگه كلمات توصف احساسي، وگلت ((ما أدري والله! يعني چنت أحس كلشي حلو، يعني كلشي اوکي والحياة ماشيه. چنک موجود وما موجود. قصدي، شلون اشرحلك.. من اشتغلت بإذاعة احباب الله تعلمت كلمة فنتازيا، تعرفها؟!)) ضحك أبو القاسم وگال، طبعاً! آني اقره كتب من چنت صغير، وكتابة الشعر هي فنتازيا اصلا. انوب سالت أبو القاسم ((شلون الانسان يگدر يعيش خارج المشاكل حتى اذا كانت عنده مشاكل؟!)) شنو قصدك؟ گال أبو القاسم. گتله، يعني مثل المخدرات، حتى اذا عندك مشكلة، عقلك يگلك الحياة حلوة وماشيه وكلشي تمام. كل أبو القاسم، تحتاج الى اغنية قديمة مال فريد الأطرش يگول بيها (الحياة حلوة بس نفهمها) بس جيب الي يفهمها؟! سألته، يعني اذا تفهم الحياة تصير حلوة؟! يگن، گال أبو القاسم، وطول بكلامه ((اكيد كل ما فهمت وتعلمت وفتحت عيونك وحواسك راح تخف شويه هموم الدنيا. يعني تعرف، الانسان مثلاً من يگبر بالعمر، الناس تأخذ بكلامه وتسمع منه. لان العمر يسوي عنده تجربة وحكمة بالحياة. طبعاً مو كل واحد يگبر بالعمر تصير عنده حكمة. قصدي كلما تصير عندك تجارب، راح يتحسن فهمك لحياتك وحياة الناس. وكلما فهمت صار صبرك على المشاكل أكبر وعلاقتك وية الناس سلمية أكثر. مثلاً قراءة الكتب تعلمك هواي! يعني مثلاً انت من تقره رواية اجنبية، خلي انگول

الاحداث بالبرازيل. انت اثناء القراءة راح تعيش هناك، يعني القراءة تخليك تصوير غريب، ودايما بالغربة الانسان يتعلم عن نفسه وعن العالم، وتزيد خبرته وتجاربه بالحياة. بس، مع ذلك، قليل من الناس تتعلم من تجاربها. والانسان بطبيعته ينسه بسرعة. وهاي نعمة ونقمة بنفس الوقت! لان لو ما تنسه راح تتخبل من كثرة التفكير، واذا تنسى مراح تگدر تستفاد من الي تعلمته بالحياة.))  
گتله ((أبو القاسم انت فيلسوف واني ما اعرف)) ضحك أبو القاسم وگال، اسمع، هاي غير سالفه، من چنت صغير چنت كلش أحب الطبيعة. صوت العصافير والنهر والأشجار. وچنت دايما اتخيل نفسي شجرة، وتجي بنية حلوة وتگعد جواي وتحچي وياي. علقت آني على كلامه وگلت ((اكيد البنية لازم يكون صدرها حلوا!)) ضحك أبو القاسم مرة ثانية وگال، من سقط صدام چنت شاب صغير، وأحب بنية اسمها سلمى. ومن وراها بديت اكتب شعر. چانت جيرانه. چنت مرات بعد الغروب، اگمز على سطحهم، نختل بصف التنور، تطلعلي صدرها وامص حلمتها. وچنه اثينه نخدر. تزوجت سلمى، ودارت الأيام! وبعد سنوات، تخيل رجعه نتواصل. تيكسات مسج، وفيسبوك، بس ما چنة نشتاوف. چنت اکتبلها عن ريحة التنور وصدرها والغروب. زوجها چان يشتغل بالتجارة يجيب بضاعة من الصين. مرة راح بسفرة طويلة شهر تقريبا. گالت لي سلمى، دبر مكان، اريد اشوفك! دبرت شقة من صديق. اجت هي وجهالها الصغار. ما قبلت انام وياها، وگالت لي اريد، بس تمص صدري مثل أيام السطح. چان صدرها صاير أكبر، وبيه ريحة حليب. ما خدرنه، مثل ايام گبل! چانت هي خايفة، وچنت آني مرتبك وأفكر بجهالها الصغار من يرضعون. حاولت أقنعا تخليني انيچه، بس ما

قبلت وچانت خايقة. بعد أيام، دزلت لي تيكست مسج، وتوسلت بيه، ان نقطع علاقتنا ومنتواصل بعد. احچيلك هاي السالفة اول مرة، لان قصيدي الي قريره لك من قبل اذا تذكر، اجت من هذا الموقف. گلت له، أي، هاي الي تگول بيه، بان صدر الحبيبة الجنة، بيه نهرين، واحد لبن واحد خمر. بصراحة شوية قصيدة تضحك! حسيت أبو القاسم شوية ضاج وبدل الموضوع، وگال، احچيلي انت قصص حبك! گتله، آي من چنت مراهق چنت أحب جيرانه، بس چانت مره چبيره بالعمر. مات من الضحك أبو القاسم. حقك تضحك، گتله، بعدين من كبرت شوية فكرت، یمكن آي چنت أحبها، لأن چنت اشتاق يكون عندي ام مثلها. ما أدري! ردت احچيله على زينب عليها السلام، بس خفت لا يفلت من لساني موضوع ايميل بلبل السيد.

چان ويانه مصور اسمه نصير المالكي. چان يشتغل فيلم وثائقي عن الحشد وبطولاته، ومعاملته الإنسانية وية الناس. شوية طبعا چان يبالغ ويچذب. يعني احنه من چنه نلزم الدواعش، نشبعهم كفضات واهانات وچلاليق، وهم يستاهلون. بس هو چان يعيد تمثيل المشهد. يصور شلون جماعته ينطونهم مي واكل، ونداوي جروحهم، وشلون نذكرهم بان احنه نتبع اخلاق الإسلام الحقيقية، ونعامل الاسرى بكل احترام. مره تعاركت ويه هذا نصير. اجه فد يوم وگلي اريد تطير لي طيارتك، حتى اخذ كم لقطه للفيلم مالتني. گتله، تعال صور من تكون عندي مهمة رسمية. هاي مو طيور زاجل اهدهن لك حتى تتفرج. ما عجبه كلامي! راح للمسؤول مالتنه، وشكاني. وانوب، نصير هذا، تخبل ازيد، من دز عليه المسؤول، وشكرني گدامه، لان اني ملتزم بشغلي وما اخالف

التعليمات. بطبيعتي ما أحقد على شخص فترة طويلة. اسامح وانسه. رحتم لنصير واعتذرت منه! وهو طلع خوش وليد، وقبل اعتذاري، وسولف لي قصته. چان لاجئ بألمانيا، ولجوئه چان مرفوض. رجع بدعوة الجهاد للعراق. بعد ايام شوية علاقتنا تطورت، وصار يشاركه گعداته وسوالفنه آني وأبو القاسم. فد يوم گال عندي جگارة حشيش. تعجبته احنه، وگال هو من چان بألمانيا چان يدخن بس ماريهونا، ويسميه وييد. اختلينه ممكان ودخنه الجگارة سوية. طبعا ظليت آني بس اگح، ودخلت بحالة من الخوف، وبقه نصير وأبو القاسم، يضحكون عليه. انوب حچالنه نصير، على ديسكو مشهور بألمانيا اسمه بريگهاين. وهذا مو أي واحد يدخله. يگول، اكو حارس گاعد بالباب. والبنات والولد لازمين سره طويل. من توصل للباب، يباوع عليك الحارس. لو يقبل يدخلك لو لا. سألناه، يعني شلون يقرر؟! يگول نصير، حسب مزاج الحارس وخبرته الشخصية. من عيونك يطلع، اذا چنت تگدر تتحمل اجواء مثل هيچ ممكان وتتكيف وباه بسهولة وتستمع، و من دون مشاكل! وگال، الديسكو بيه كل اشكال وانواع المخدرات. وتجارب الجنس مفتوحة، اشكال وأنواع. ولد وية ولد، نسوان وية نسوان، وزلم ونسوان. فردي وثنائي وثلاثي. شترید اكو! صفن شوية نصير، انوب كمل سالفته، وگال: چانت اكبر صدمة بحياتي.. اخذت كوكايين، وبديت أفتر بالمكان والي چان كلش چبير، والموسيقى كلش عالية ماتگدر تسمع الي بصفك يسولف. چان اكو ناس تتنايچ بالمكان ومحد مهتم بالثاني. فجأة اجت وحده تقربت مني. ماچنت اعرف إنكليزي، والماني كلش شوية. چانت البنية كلش حلوة، وصدرها طالع من ثوبها. (راسا آني باوعات على أبو القاسم اختصاص الصدور



وابتسمت!) بدت البنية تلزم بجسمي وتفرك بطيزي، وكامت تلعب  
بشعر صدري. انوب بستها بوسة طويلة واني رايح خدران، گام زي،  
مديت ايدي على كسها، وطلع مو كس، طلع زب، وهم مگوم.

ضحكنه، وبقينه متعجبين، وعبالنه نصير يجذب ويبالخ عن حياة  
الديسكو. ساله أبو القاسم، بصراحة شنو صار بعدين؟! گال نصير،  
تدرون، كوكايين والدنيا محترگه، بصراحة نچته او نچتها من وره!  
بس بالحسين أبو عبد الله، كلشي بي چان بينه، صدره، شفايفه،  
صوته، ريحته.

طبعاً بيومها فكرت هو يبالخ لو يجذب عينه. بس بعد ان  
صرت لاجئاً بالسويد، تأكدت من كلام نصير المالكي، وطلع صحيح  
اكو هيچ ديسكوات، وكل الي گاله عن بريگهاين، النایت كلوب في  
برلين صحيح. واكو أنواع واشكال مثل هاي الديسكوات، خاصة  
بألمانيا.

مسكين نصير المالكي، قبل تحرير تلعفر، چان يصور بقره صايره  
نصين بالقصف المدفعي، ضربه قناص داعشي بگسته وكتله. هسه  
لو باقي بألمانيا يحشش ويتنايچ مو احسنله! ظلينه آني وأبو القاسم  
دائماً، تتذكر نصير وجگارة الحشيش، وطريقته من يوصف الكس  
الي چان زب، وانموت من الضحك.

قبل يوم من اقتحام تلعفر، گعدنا الفجر. استعدينه، وطيرنه  
طيورنا. استطلعنه المنطقة. الدواعش بدو يرمون على طياراتنا،  
فانسحبناه. انوب هم طيرو طيارتهم، وبدوا جماعتنه يرمون عليهن.  
وصار شوية ضحك بالموضوع. نظير احنه وهم يرمون، وانوب  
العكس، يطيرون همه واحنه نرمي. أبو القاسم گال، شني هاي،  
الحشد وداعش صارت حربهم مال مطيرچية.

بقينه على هذا الحال، الا ان صار عطل بطياري. فجأة نزلت فوگ سطح عمارة. حاولت اطيها من جديد، بس ما فاد. اختفى البث فجأة مال الطائرة، وبديت كلشي ما اشوف على الشاشة، وانرعبت! فكرت، يمكن الدواعش لزمو طياري لو وگعوها! حاولت اشغلها من جديد، بس ماكو شي. وچان والله بعد ١٠ دقائق، رجعت الطائرة للحياة، وطارت من السطح، وبدت تصور. تنفست وگلت، الحمد لله، ربك ستر. فريت الطائرة ورجعتها، حتى أتأكد من وضعها. نزلتها على الكاع، وبس تقربت منها، انفجرت.

گعدت بالمستشفى، ورجلي اليسره مضمدة وما اگدر اتحرك. اجه الطبيب وگال، حمد الله على السلامة، وشرح لي بان الإصابة چانت خطيرة، وصار تمزق بالعضلة وتلف في بعض الاعصاب. وگال راح أبقى أعرج، عرجة خفيفة، طول حياتي.

اجو جماعتي من سرايا الحمام يزورني، وچايين تکه وکباب وبرتقال. انوب راحو بقية الولد، وبقه يمي أبو القاسم، سألني عن الي صار؟! حچيتله، شلون نزلت طياري على سطح عمارة، وشلون اختفه البث فجأة، وشلون بعدين رجعت الطائرة فجأة للحياة. ابتسم صاحبي وگال، جماعته حققو بالموضوع، ووصولو الى نتيجة. الدواعش لزمو طيراتك بالسطح، حجبو الكاميرا عنك، وخلو بسرعة قنبلة صغيرة بالطيارة. رجعتك انت، وانفجرت عليك

رجعت للبيت بإجازة مفتوحة، وظلت كريمة تبچي ومقهورة على حالي. آني هم چنت شابع قهر على حياتي، ودخلت بصفحات مرة وطويلة. بالليل، چانت كريمة نائمة، عجيب حتى وهي نائمة المسكنية، چانت تتحسر كل شوية. غريبه هاي الانسانة! خليت

ايدي على صدرها حتى أحس بأنفاسها وحسراتها، انوب تذكرت  
أبو القاسم وسوالفه على صدور النسوان، وابتسمت! نيست اگل  
لابو القاسم احنه من چنه صغار، جانت الفتنازيا مالتنه تشبه  
قصيدته التعبانة عن اللبن والخمر وجنة الصدر. چنة نڭول واحنه  
جهال واحد للثاني ((أمك عنده ديسين.. واحد حليب واحد چاي))  
ونضحك، وانوب نتعارك، على سالفة الصدر!



## شهداء البلبل

الحمد لله والشكر على كل حال، بعد ان چنت محسن البلبل، صارو يسموني، بلبل الاعرج. هاي الناس ولا ترحم، حتى و هم بنص الخيسة والخراب والضيم، بعدهم يقلدون ويضحكون واحد عالثاني. العراقيين گلوبهم من حجر، والحسين أبو عبد الله!

تحررت الموصل. وصارت عندي بنية، سميتها حوراء. سبحان الله تشبه أمها، وماخذه مني بس الخشم الطويل. گلت لكريمة، خلي نشوف، راح تأخذ منچ الحسرات، لو تاخذ مني الصفنات. ضحكت كريمة، وگالت بس لاتخذهن اثنيهن، وتصير حوراء ام الصفنات والحسرات.

الحمد لله مصيبة داعش خلصت تقريبا، وچنت فرحان بحوراء. أخيرا صرت اب، وگلت هسه لازم أفكر شوية جديات بحياتي علمود مستقبل بنتي. رحلت لعمي طاهر وچچيت وياه. طلبت منه مساعدة، حتى اشترى تكسي واشتغل عليها. گال ليش ماتبقى بالحشد، والدولة راح تهتم بيهم، عرجتك خفيفة، ويمكن تشتغل بالأمور الإدارية. شافني متردد فگال، خوش، ارجع هسه للمكتب، وراح اخصص لك هاي المرة راتب رسمي، وخلي نشوف موضوع التكسي بعدين. رجعت لمكتب احباب الله، واني أغني، شجابرک على المر غير الامر منه! وبعد أسبوع، عمي طاهر كلفني بمهمة سهلة وبسيطة، حسب مايگول، والمهمة بيها الي اجر كبير عند

الله. شغلتي الجديدة هي عوائل شهداء احباب الله، الي حاربو وية الحشد. يدزون بيدي ظرف بيه مبلغ بسيط، اوصله لعوائل الشهداء، وانطيهم وعود عن حقوقهم المستقبلية، الي راح تتكفل بيه الحكومة. يعني شوية فلوس وكلش هواي وعود! من البداية ما عجبنتي الشغله! هسه عود ليش آني.. ماكو غيري الهاي المهمة، والله العظيم عمي طاهر راح يخبلني!

چان عدنه بالبيت مرايه چبيرة، چنت ارواح واجي گدامها كل يوم، واباوع على شكلي، شلون صرت أعرج. چنت كلش مقهور، ونفسي مكسورة. اخذتلي صفنه واني اباوع على نفسي، وگلت لازم اصير قوي، وماخلي بنتي حوراء تحتاج شي، وهاي اخر مرة اباوع بيه على نفسي، وأفكر آني صرت اعرج. والحياة مستمرة، مثل مايگولون بالمسلسلات. دخلت للحمام زينت لحيتي وشواري. لبست ملابس جديدة مشتريهن من الكراة، ونزلت للگهوه اشوف صديقي بالمنطقة، علي عبد الحسين. سولفته آني عن أيامنا بالموصل، وشكالي هو من أحوال المدرسة الي يدرس بيها. البناية قديمة، والمدرسين تعبانين، والمنهج متخلف. وچچالي عن مشاكل التعليم بشكل عام بالبلد. چنت كلش احبه واحترم أفكاره. رجال متحرر وصادق، وبصراحة چان ضد سياسة الأحزاب الإسلامية كلها، شلع قلع. وچان دائماً يگول العراق بعد كل سنين المعاناة والحروب، چان يستاهل شي أفضل من هاي الأحزاب المتخلفة الفاسدة، الي تغطي فسادها بعباية الدين. دائماً چنت احذره من كلامه، واگله يدير باله. اكو ناس ما راح تفتهم چچيه، وبسرعة راح يخونونه. مچان يهتهم، چان زمة سبع، وچان دائماً يسولف لي عن التعليم والصحة. يگول العراق اذا يريد بيدي صحيح، اول شي يحتاج يخلي كل طاقته

لتحسين التعليم والصحة. واهم شي الصحة النفسية. كتله، علاوي، الطبيب النفسي للمخابيل بالنسبة للعراقيين! گلي، بعد كل هاي الصدمات والأزمات والحروب، تتخيل العراقيين بعدهم صاحين؟! بلبل حبيبي، أي مجتمع ما يعترف بأمراضه، وينقد نفسه ويعالج نفسه، اقره عليه السلام. وشرحلي شنو تسوي بالإنسان الجروح النفسية، من تنزل عليه المصايب والصدمات. گلي جروح الجلد واللحم، تطيب بعد فترة. بس جروح الروح، صعب تطيب، واي مشكلة صغيرة، تلجم الجروح من جديد. كتله ((واني جروحي من تلجم تدي)). ضحك وگال، أي غناها فؤاد سالم ((ردي ردي لاتهيجين الجروح.. خاية ردي)). سألني علاوي عن شغلي الجديد. حچيته عن موضوع الشهداء. وگلي مع الأسف بلبل، انت راح تشترك وياهم، بقشمة الناس، والمتاجرة بدم الشهداء ومصيبة أهلهم. ياريت فد يوم تصحه، وتعوفك من احباب الله هذول. وتره آني اعرف حچي الناس عنك محسن! يگولون فقير ومن هاي السوالف، بس آني اعرف انت تفتهم وذكي وكلش خوش زملة.

اول عائلة زرتها، چانوا عايشين بمنطقة الحسينة. گاعدين بهيكل، والبيت چان واضح حالته التعبانة. چان الشهيد عنده ۳ بنات صغار و ولد بعده يرضع. استقبلني أبوه، واجت مرت الشهيد تسلم عليه. انطيتها الظرف الي بي فلوس. شكرتني المسكينة، وبچت، وراحت لجهالها. شغلت آني الاسطوانة الي حفظته من عمي طاهر، بان شلون احباب الله مراح ينسونهم، وراح من خلال مؤسسة الشهداء يأخذون كل حقوقهم، وشلون برلماني جماعة احباب الله راح يضغطون على الحكومة، حتى يستعجلون بتكريم الشهداء. بقه الرجال أبو الشهيد يسبح بسبحه سووده طويله، وچان لابس دشاشة سووده. حسيت

بيه معصب، وما مقتنع بكلامي. سألني، عندك جهال؟ كتله أي بنية صغيرة اسمها حوراء. گلي كل فلوس الدنيا ما تعوض موت ولدك لو بناتك. دنغت من المستحه والقهر! حصرتني البجیة، وحسيت مختنگ، وما عرفت اجاوبه. كتله من رخصتك، لازم ارواح! وگف الرجال، وصلني للباب، مدیت ايدي حتى أسلم عليه، ما مد ايده هو، وگلي، الله وياك عمي!

بالطريق للبيت، گلت لنفسي، واضح هاي الشغلة راح تشبعني قهر واحراج. اخذتني الصفنات، ودتني وجابتني بهواي شغلات. الناس العايشة بسلام، تموت بشكل طبيعي. تكبر بالعمر، تعيش حياتها، تشوف أولادها يكبرون، يفرحون ويحزنون، ويشوفون احلامهم تكبر وياهم. بس بالعراق الموت بيه ينزل فجأة على حياتك مثل الصاعقة، وما يفرق بين چبير لو صغير. ومن كثر الموت الي صار اخر سنين، حتى بعد ما عدنه وكت نتذكر كل الناس الي ماتت فجأة، واختفو من حياته. بالفصيح يگولون (داهمه الموت) عبالك الموت فرقة اغتيلات. ويگولن للمريض، چان (يصارع الموت) عبالك الموت ثور هايچ لو وحش. ونگول (اجاه الموت) زين شلون اجه، مشي، ركض، طایر مثل عزرائيل. ومرات يگولون (اختطفه الموت) تگول الموت ميليشات وقحة، ويخطفون الناس ويصكونهم. والناس تگول (انتقل الي جوار ربه) بس شلون، انتقل؟ تخيلت نفسي ميت، وصاعد مثل الصاروخ يم ري. چنت كلش مقهور من ظلم هاي الدنيا، وحسيت نفسي افور، جدر ماي وعلى النار! العصر رحت والتقيت بصحاي علي عبد الحسين، وچيتله عن صفناتي على الموت. ضحك على سالفه الصاروخ ومصارعة الموت واختطافه، وخاصة فكرة الموت الي يخطف، ويشبه الصكاكة. چچالي علاوي،



على أفكار الانسان عن الموت بالأديان والعالم والفلسفة. العلماء يفهمون الموت، بنهاية الخلية. تشيخ وتسكت وتتعطل. گتله، يعني الانسان مثل الة تتعطل. وسلولفي عن نظرية يحبونها الملحدین، عن دارون والتطور. سألته، علاوي انت ملحد؟! گال، تقريبا، الي مثلي يسمونه (لا أدري) يعني ما يدري اكو أله لو ماكو. المؤمن هو الي يؤمن بوجود الذات الإلهية والملحد يكفر بوجود الاله. والي ما يدري مثلي، يعني ببساطة ما متأكد، ويشك ويفكر ويدور بهاي الدنيا، الي صعب تفهم، عن أجوبة وأفكار. وطبعا اللادرية هي فلسفة قديمة ومكتوب عنها كلش هواي كتب.

گتله ((هاي الناس عبالها بس اياد علاوي ما يدري؟! طلعت هاي فلسفة كاملة الناس كلها بيها ما تدري شي؟!)) ضحكنا! اخر شي گتله، علي دير بالك خويه من هاي الأفكار، وانت تعرف شنو عقلية المناطق الي عايشين بيها. وعبالك چنت حاس والله العظيم، راح يصير شي! بعد أسبوع اختفى علي. اهله دورو عليه بالمستشفيات ومراكز الشرطة وماكو خبر. يگولون قبل ما يختفي، چان كاتب بوست، يسخر بيه من ايران والخميني. گلت لعمي طاهر، لازم ندور على علاوي، ونفتهم منو الي خاطفه، هو جيرانه وصديقي، وبلكت جماعتنا احباب الله، بعلاقتهم يعرفون وين صار! گلي عمي، صديقك علاوي مايگعد راحة، أكثر من مرة الوادم چچت وياه وگتله، ينتبه على الي يكتبه بالفيس، بس هو چان صخل ومعانند. زعلت آني، وگلت لعمي، علي خوش زلمة، وگلبه محروك على أهلنا، و ماتشوف انت حال المستشفيات والمدارس والخيسة الي عايشين بيها. بس تمطر شوية نخرگ بخيسة المجاري. گال، هذا غير موضوع، وان تحچي على مقدسات الناس موضوع ثاني. وگال

عوفك من هاي السالفه، وانطاني ظرف جديد، وعنوان عائلة شهيد بمنطقة الشعلة. طلعت ضايح من مكتب احباب الله. وفكرت، ممكن جماعتنا نفسهم، خطفوا علاوي. كلشي يصير! جماعته دائما يذبون مثل هاي السوالف، براس الميليشيات الوقحة، ويگولون، سيدنا وقائد احباب الله، ما يقبل على هذا التصرفات.

اخذت تاكسي ورحت للشعلة. وچنت كلش ضايح على صاحبي علاوي. چان شهيد الشعلة عمره ١٩ سنة. واثنين من اخوانه مكتولين بفترة الطائفية. وباقية بس امه وجدته وجهال اخوته، وأبوه رجال چبير بالعمر. سويت الواجب، وشكروني اهله وظلو يدعون للسيد، الي صوره چانت تارسه حيطان البيت بكل مكان.

قبل ما ارجع للبيت اشتريت لعبة لحوراء تشتغل على الباتري. طبختنه كريمة دوملة من هاي الزينة. چان تموز والدنيا حارة كلش، وچنه گاعدين على هوه المبردة. بعد الغده، نامت حوراء. تمدنا انا وكريمة سوية، سويتلي راس، ونامت كريمة. ورحت آني لغرفة المطبخ، صبيت شربت زبيب، فتحت اللابتوب وبديت ادور بگوگل على أي موضوع يخص (المقدس والمقدسات). بس اريد افتمهم، يعني وين المشكلة اذ الواحد ينقد المقدسات!؟

العصر خابرنبي عمي ورحت للمكتب. انطاني هلمرة، تلت ظروف متروسة فلوس. وگلي هذول تلت شهداء من عائلة وحده بمنطقة النهروان، وهاي رسالة خاصة من السيد نفسه، للعائلة. گال تگدر تروح الهم، باچر الصبح. اخذت الفلوس انطيتهن لكريمة تضمهن، وگتلها ضايح، ورايح للكرداة، شوية اشتري ملابس وارجع. چنت احب كلش أجواء الكرادة، ودايما اشتري منها الملابس. ولو بس

تصير عندي فلوس، اشتري بيت بالكرادة ومااطلع منها للأبد. سألت كريمة اذا محتاجه شي، تحسرت، وگالت لا بلبل، سلامتك، ما محتاجه شي. گتله بس انت من تگولين لي بلبل، احسها حلوه، البقية احسهم يسبوني. سالتني، بلبل صدگ تحبني؟ طبعا كريمة، انت حبييتي والدنيا مالتني. حضنتني وباست ايدي، وبست ايدها وطلعت.

اشترى بس تيشيرتات وشفقة زرگة. وبعدين رحلت لعصائر الأمير، وگعدت وطلبت، عصر موز. مدمن عصائر من أيام ماچنت اشتغل على عربانة تعبانة أيام الحصار. اشترى لكريمة ثوب مال نوم ولباسات، چنت كلش أحب اشترى اله بنفسي لباسات وسوتيانات. اشترى ع السريع وطلعت من المحل، لان چنت مستحي. طلعت قياس صغير، وظلت كريمة تضحك، وگالت هذن مال بنية صغيرة. راح انظيهن لبنت جيرانا ام علي. سألتني كريمة عن اخبار صاحبي علي عبد الحسين. گتله والله مقصر، اليوم ارواح اسال على اخبار زوجته. رحلت لبيت علي. خطية چان عنده بنية و ولد، الله يخليهم، حلوين وشطار. زوجته هم چانت مدرسة بالمتوسطة، تدرس إنكليزي. بچت خطية، وگلت لي ماكو أي خبر، وتوسلت بيه احچي وية عمي طاهر حتى يساعدهم.

ثاني يوم الصبح رحلت لمنطقة النهروان لبيت الشهداء الثلاثة. والى چانت أسمائهم جاسم وحازم وباسم. دگيت الباب، ومبين ماكو أحد. چان البيت طابقين. دگيت باب الجيران. طلعتي رجال قصير أصلح، لابس دشداشة بيضه. سألته عن اهل الشهداء، گال ما عدهم اهل، هم بس تلت اخوة، واستشهدوا الله يرحمهم. ما فتهمت، وسألته، امهم ابوهم إخوانهم جهالهم؟! گلي، تفضل طب

عدنه، واني اسولف لك سالفتم. ضيفني الرجال، والي اسمه أبو مهدي، وجاب چاي وكعك. وچالي قصة الولد. گلي جاسم وحازم چانوا توأم، وباسم يكبرهم بسنة وحدة. امهم بعد ان جابت التوأم بسنة صارت عندها جلطة وماتت، الله يرحمها! والمساكين چان عدهم مشكلة بالوراثة. چانوا كلهم عميان، ما عدا امهم چانت تشوف. وراثة من ابوهم الي چان هم اعمى. وفد يوم، گبل ما يستشهدون الولد، ابوهم چان يعبر الشارع، ودعمته سيارة ومات. گتله متعجب ((عميان وبالحدش؟!)) تحسر أبو مهدي وگال، اكو ناس عميان بس يشوفون أحسن من الناس الي مفتحه، ويفتھمون أكثر. الولد چانو كلش اذكيا، تعلموا القراءة والكتابة، بهاي الطريقة الي يسمونها، بريل يمكن، هاي الي يتعلمون بيه الحروف باللمس. گتله، أي، اسمها بريل لو برايل! المهم، گال أبو مهدي، چانوا الولد شطار كلش، وعدهم موهبة عجيبة سبحان الله، يتعلمون لغات بسرعة. من چانوا مراهقين صغار تعلمو ثلاثهم العزف على الكمان، وتعلمو الإنكليزية اول شي بشكل كلش عجيب. چانو موهوبين، الله يرحمهم. وصارت حياتهم كلها بس موسيقى وتعلم لغات. من طبوه الامريكان، چانو بعدهم شباب صغار، وچانت الناس كلش تحبهم، ويعزفون بالاعراس. بس من كبرو شويه، بدو يحبون يعزفون هاي الموسيقى مال الأجانب، الي يسمونها كلاسيكية. اشتغلو وية شباب فنانيين بالمسرح والتلفزيون. وحتى مرة صورهم بتقرير طلع بالتلفزيون. المهم، كبرو الولد وبقو يطورون من نفسهم، وتعلموا هواي لغات. لو ستة لو سبع لغات يعرفون! إنكليزية وروسية وفرنسية والمانية وفارسية وحتى كوردية. ومن صارت هوسه، راحو الولد، واطوعو بالحدش. طبعاً جماعتنه

بمكتب احباب الله بالمنطقة، استغربو، وشكروهم وگالولهم، نرجع لكم خبر بعدين. وقيادات الحشد من سمعت بقصتهم، راسا دزت عليهم. وطلعو چانو محتاجينهم كلش. الدواعش چان عدمه ناس من اوربا، وكل بلدان العالم. وچان الحشد عنده، خلية تتنصت على المكالمات. الدواعش مرات يرطنون باللغات الأجنبية حتى محد يفتهمهم. لهذا چانو الولد، مفيدين كلش بهذا الموضوع. الامريكان الحقراء خوات الكعبة، قاصفين مقر للحشد، يگولون بالخطأ. استشهدوا الولد ثلاثهم، وية ١٠ من جماعتهم الي بالمقر. بعدين گلي أبو المهدي: اذا تريد تكرم أرواح الشهداء، لازم تكرم الرجال الي اعتنه بتعليمهم وساعدهم على تعلم اللغات. وهو چان بمثابة ابوهم ومعلمهم. چان عايش ويانه هنا بالمنطقة. اسمه رضوان. الناس ضايقته بالمنطقة لان چان مدمن ع العرگ. هسه عايش بشارع الرشيد وحده بفندق تعبان.

شكرت أبو مهدي، واخذت من عنوان الرجال، ورحت لشارع الرشيد. چان عندي فضول اعرف قصة الشهداء، من هذا الي اسمه رضوان. چانت غرفته بالفندق شبه معفنة ومتروسة بطالة عرگ فارغه. وچان رضوان تقريبا مو بوعيه، وجوعان. طلبت له نفر كباب من مطعم بصف الفندق. وچچالي على جاسم وحازم وباسم. گال العراق بيه مواهب كلش هواي، بس هوسة البلد، مضيعه المواهب. أصلا العراق كله مضيع نفسه، گال، وكرع بيك، وسوى بصل الكباب مزة. سلولفلي شوية عن حياته. شلون چان عايش بلغاريا بزمن صدام. وچانت عنده زوجة بلغارية مدرسة، تعلم لغة اريل. تعلم رضوان منه كل شي، وساعدته زوجته يدرس لغة اريل، ويصير معلم لغة، للعميان. من سقط صدام، چان الحنين

كلش ما اخذه للعراق. وچان گدامه حلين، لو يموت بالغبية من القهر والحنين، لو يرجع ويعوف زوجته البلغارية الي كلش ساعدته. انفصل عنها أخيرا ورجع للعراق. انصدم بوضع البلد، وحس نفسه غريب، والعراق صاير مو نفس العراق الي چان يتخيله. خابر زوجته البلغارية، ورزله وطلبت منه ان ما يتصل عليها بعد، وتمنت ان ما تشوفه مرة ثانية بلغاريا. دخل رضوان بحالة كآبة، وزاد شربه للعرك. الشي الوحيد الي نقذه بالبداية هم الولد، حازم وباسم وجاسم، من تعرف عليهم. صاروا هم طلابه وولده وكل حياته. علمهم القراءة والكتابة، وبقه يتابعهم، ويساعدهم. وصار أكثر من اب وصديق واخ الهم. من استشهدوا، انتهى الامل بداخل رضوان، دخل بطل العرك، وبعد ما طلع منه. صار مثل الجنى المحبوس بالمصباح.

چنت خايف انطى الفلوس كلها لرضوان ، ويرزلى عمي لان انطيت الأمانة لواحد راح يعتبر غريب عن الولد الشهداء، وانوب سكير. أخيرا گلت لنفسى، چذبه صغيرة تساعد هذا المسكين، ما راح تأثر بميزانية احباب الله! انطيته الفلوس، ورسالة السيد القائد. صب بيك، وبده يشرب ويقره الرسالة، وهو يضحك ويهز بايده. عفته، ورجعت للبيت. خابرت عمي وگتله الأمانة وصلت. عفية، گال، محضرك شهيدين، مر على المكتب الصبح! اعتذرت منه، وگلت، أحس بالمرض وأريد ارتاح فد چم يوم. گال عمي، حقك، وانت تحتاج إجازة! ارتاح لك أسبوع ومر علي، واذا تحتاج شي بس خابرنى.

بعد أسبوع شفت عمي طاهر بفاتحة صاحبي علي عبد الحسين.

لگوہ مدفون بخرابہ۔ صدفہ نابشہ جثتہ الجلاب، وطالعہ ریحتہ، والناس بالمنطقہ مخبرین الشرطۃ۔ چان عمی غالب وجہہ علی، وما یحچی ویای۔ رحمت گعدت یمہ، وسألتہ، شصایر؟! گلی من تخلص الواجب بفاتحة صاحبك، مر علي علی المكتب۔

رحمت للمکتب، وسألني عمي عن فلوس الشهداء حازم وجاسم وباسم۔ گلی، امن انطیت الفلوس؟ حسیت اکو شی لو یعرف شی۔ فحجیتلہ السالفۃ من البدایۃ للنهاية، واعتذرت له، وگنلہ انطیت الفلوس لرضوان معلم الشهداء۔ تسودن عمی، وگلی تنطی فلوس مال تلت شهداء لواحد سکیر مو من اهل الشهداء۔ شگل للناس، وین اضم وجهی! گتلہ بس اهدا وفهمنی۔ وحقالی!

بعد أيام من رحمت آئی للنهروان وشفت الاصلع أبو مهدي جيران الولد الشهداء۔ جایۃ عمۃ الشهداء حتی تاخذ اغراض البيت۔ الاصلع أبو مهدي گایل للمره ((السید القائد داز رسالۃ وفلوس کلش کلش هوای بید واحد۔ بس آئی گتلہ ما عنده اهل، ودلیتہ علی رضوان مدرسهم۔)) المرۃ متخلہ، وچانت فقیرۃ تشتغل علی باب اللہ تبیع مخضر بالسوک۔ رایحۃ للمکتب الی بالنهروان مسویۃ مناخۃ، وگایلۃ للمکتب بان هی چانت مثل ام الشهداء العمیان، وحالها حال الضیم، وزوجها شرطي معوق۔ المهم، ما مخلیه مصیبة ومرض وحاجۃ بحیاتها، ما ملحتھا وباجیۃ علیها بمکتب الاحباب، الی ان میچیہ اللہ نفسه! متصلین من مکتب النهروان بعمی طاهر، و مترجینہ ان ینطی ہدیۃ السید ورسالتہ، لعمۃ الشهداء۔

شبعث رزالۃ من عمی طاهر، وانطانی إجازۃ مفتوحۃ، وگلی: روح دبر نفسک، منا لمن أحل ائی ہای المشکلۃ۔ خجلتني وفشلتني، ولك

ليش انت مرعبل ومخربط! كل ما خليك بشغلة زينة، حتى يصير  
براسك خير، تخربها، وتفشلني و تخرجني گدام الوادم. انوب طردني  
(الله لا يوفقك على هاي الدگة. بره، يالله اطلع بره!!)

شگد تمنيت صدگ يعوفني عمي طاهر، واخلص من مكتب  
احباب الله، وكلاواتهم ونفاقهم وسوالفهم التعبانة. چنا نايمين  
بالسطح. وچانت السمه صافية، وچنت اباوع على نجمة تلمع.  
چنا متغطين بشرف خفيف. مدت كريمة ايده على زي، وگومت  
راسا. خلصنه سوية بنفس الوقت، آني وكريمة، من دون ان نطلع  
صوت، حتى الجيران ما ينتبهون. تحسرت كريمة وغفت، وتحسرت  
آني ودخلت بصفنة عن السمه والكواكب الثانية. هسه اذا اكو حياة  
بكوكب ثاني، هم راح يكون بيها سادة واحباب؟! غمضت عيني،  
وتخيلت نفسي عايش وية عصابة بالمريخ، كلهم عرجان مثلي  
وعميان مثل الشهداء!



## تك تك البلبل

ناقشت عمي، أكثر من مرة! كتله، آني ما افتهم، احنه احباب الله، مو ويه ثورة الشباب ضد الفاسدين، ليش تريدني اشتغل جاسوس عليهم؟! ظل يلف ويدور، وما فتهمت كلشي منه. الي فهمته، چان يريد مني اعرف اذ اكو قيادات للثورة، وإذا اكو تمويل خارجي للمظاهرات.

الامر والطاعة، لعمي ولأحباب الله، هو اكو واحد يگدر يگول لا! اشترولي تك تك، ودخلت بنص الثوار بساحة التحرير، بعد ان احتلوا المطعم التركي، وصار اسمه جبل احد. وطلبو مني الجماعة، ان اكتب كل أسبوع تقرير.

ثورة التك التك، چانت بداية جديدة لحياتي. غيرت تفكيري، وخلتني مو بس افهم أشياء جديدة، خلتني التقي واعرف بغداد لأول مرة بحياتي. حسيت چنت غريب قبل الثورة، وبغداد چانت هواي بغدادات. بغداد الكرخ وبغداد الرصافة. مناطق السنة ومناطق الشيعة. الناس الفايخة والناس التعبانة. الشروگيين والبغادلة. المناطق الراقية والمناطق الفقيرة. المتعلمين والجهلة. بس من طبيت بنص الثورة، وصرت واحد منهم، شفت بغداد وحده. اول مرة حسيت احنه من مدينة وحده، ونعرف بعضنه. چنا اغراب قبل الثورة، كل واحد چان عايش بدائرة، مسجونين، وية ناس تشبهنه، ونصحہ ونام وياهم على نفس الهموم والسوالف.

التك تك خلاني التقى واشوف ناس بحياتي ما فكرت فد يوم احچي وياهم لو التقى بيهم. اول مرة بحياتي اسولف وية بنات حبابات وذكيات ويخبلن من مناطق راقية، يحبن العراق من كل گلبوهن. حچيت وية أطباء ومهندسين وعمال وتجار. شفت طلاب جامعات، تحس بالفخر، وتتمنى ولدك وبناتك يصيرون مثلهم، وتتحسر لان هاي الخبرات مو هي الي تقود البلد. شفت ناس مغتربين، عايفين أطفالهم وشغلهم وحياتهم باوربا الي تشبه الجنة، وراجعين يکنسون بساحة التحرير. شفت شباب صغار، ما خذهم الحماس، عيونهم مورمة من التعب ومن غازات جماعة الشغب. شفت شباب وشياب ونسوان چيرة بال عمر، يطبخن ويخبزن ويدعن ويبچن. شفت فنانين ومغنين واعلاميين وشعراء. شفت شباب من المحافظات لابسين اوراحهم چفن. شفت فقراء وشفت اغنياء. وشفت طبعاً ناس جاية لساحة التحرير سياحة وتاخذ بس صور، وشفت نصابين ونشالة وحرامية. وشفت ناس ماعدها شغل وعمل، والتحرير صاير بيتها. شفت كلاوجية، ومرعبلين يخربطون أمور الثورة. وشفت سكارى ومتدينين. شفت خوش ولد وشفت خوات گحبة. شفت اشكال وانواع. والاشياء الزينة چانت أكثر وأكثر. وشفت البطولات الي تشبه الأفلام، وچانت التحرير، تنبض، محبة وخوف وقلق وغضب وامل.

شفت العراق كله، بساحة التحرير. شفت بغداد كلها، تكعد الصبح تتریگ بساحة التحرير وتگول، صباح الخير يا وطن.. اريد منك وطن! حسيت اريد اكتب شعر، قصص، أغاني. روعي صارت نصها فرح ونصها حزن. نصها امل ونصها خوف.

اول مشكلة صارت وية عمي طاهر، هي التقارير الي چنت اكتبها وأسلمها كل يوم جمعة العصر. اولاً، ضاح لان التقارير مالتني چانت مکتوبة بالعامية مو بالفصحى. گتله ما اگدر اکتب بالفصحى، بعدین احنه نحچي وعایشین بالفصحى لو بالعامية الي تحچي وياي بيه هسه؟! گلي بابا هاي أمور رسمية. گتله شنو يعني رسمية؟! خو هو حتى السيد قائدنا شعاراته المشهورة كلها بالعامية ومن يحچي بالتلفزيون الرسمي مال الدولة، يحچي بالعامية. گلي، انچب ولك، لاجيب طاري السيد. انوب اشتكى عمي طاهر من التقارير، وگال شو كلها بطولات، ومسوي الثوار عبالك ابطال مال أفلام! گتله: والله اني ما اجيب حچي من جيبي، يعني اذا شاب عمره بالعشرين ويفتح صدره گدام جماعة الطرف الثالث والشغب والميليشيات، ويضربه قناص جبان خاتل ويكتله، بعد شلون تصوير البطولة ماتفهمني؟! بس احنه غير ما عنده مخرجين مثل مال هوليوود حتى يصورن لك واقع هذول الشباب الابطال. عدنا مضاريط بالتلفزيونات مالتنه، گاعدين يشوهون صورة الثوار ويسقطون بيهم، علمود يغطون على فسادهم الحرامية.

ضاح عمي، وگلي، ولك شو انت صاير مدري شلون تحچي ومتغير، شو صاير ثورجي براسي؟! گتله، عمي سؤال رحمة لأبوك، احنه جماعة احباب الله مو ضد الفساد؟ گال، أي. زين السيد مو وية المظاهرات؟ گال، أي طبعاً. زين السيد مو يمجده بالثوار ٢٤ ساعة بتوتير؟ گال، كافي ولك، لاتبقه تمضوط. فتح عيونك، وأريد قائمة بأسماء الناشطين. وأريد فد تقرير زين، شي نرفع راسنا بيه، من ندزه لمكتب السيد. گتله، عمي آني بديت ما افهمك، ولا افهم احباب الله، ولا حتى شيريد السيد. عصب عمي وصاح بوجهي

((اكل خره وانجب يا الاغم.. روح الشغلك، زمال! صاير يتفلسف  
علي الاعرج)) باوحت عليه ودمي بده يفور. من غال هاي الكلمة،  
الاعرج، عمي طاهر انتهى بالنسبة لي، مات، ودفتته بمكبرة الخساير  
الي بحياتي.

زوجتي كريمة، گالتلي، بلبل أحسك متغير، صفناتك بدت تطول  
كلش، ودايما مهموم. حچيتله على الشباب الحلوين الي ينكتلون  
بالمظاهرات، وهم بعدهم مثل الورد. وگتله، أتمنى عندي سلطة،  
وأخلي كل الاحزاب بالسجون مدى الحياة حتى نخلص من هذول  
الخونة، الي يكتولن بشعبهم ويطلعون يتمضحكون بالتلفزيون، على  
أساس يحللون الوضع العراقي. خلي يحللون طيازتهم الفاسدة بلاعين  
العير، السفلة، الي بايعين طيازتهم لخامنئي ولإيران.

خابرني عمي، وگلي الأسبوع الجاي اريد تقرير واضح على ناشط  
لوقيادي بالمظاهرات. وإذا ما تگدر، تعال ارجع للمكتب، سلم  
التك التک، وعدنه شغل ثاني وياك.

رجعت فد يوم من التحرير وملابسي كله ملطخة بدم الجرحى.  
كريمة چانت كلش خايفة وظلت تتوسل بي، الله يخليك محسن  
بطل من روحة التحرير. ذبت هي ملابسي بالغسالة. دخلت آني  
للحمام ونظفت نفسي. رححت فتحت اللاب توب مالتني، وباوحت  
باليوتيوب على خطبة المرجعية، ورايها بالثورة والشوار. اجت اختي  
زهرة خطار. الدنيا بكوم، وزهرة بكوم! أشبع قهر من أفكر بحالها.  
بعدهي ما متزوجة. لا تعليم ولا شغل، وباقية تخدم بيت خالي.  
گتله، زهرة تريدین تجين وياي للتحرير تشوفينه؟! فرحت خطية،  
وگالت، بس أخاف من الدخانيات. گتله لا تخافين، آني اعرف شلون

ازورچ التحرير، وتطلعين منه سلامات. عفتها وية كريمة يسولفن على أسعار الملابس، واخبار بنات المنطقة، والزواج والطلاق، والحظوظ. طبييت لغرفتي. لازم اكتب التقرير لمكتب الاحباب. چانت براسي ألف قصة وقصة عن التحرير. وجنت أفكر بكل الابطال والبطلات، الي ماطلع جيل يشبههم بكل تاريخ العراق. چنت أتمنى عندي إمكانيات كاتب رواية لو قصص، حتى اعرف شلون اطلع قصصهم. عليمن اكتب ومنين أبدي! على يا شاب وشابة، اسولف! لازم يجي فد يوم، ويصير لهوای من ابطال التحرير تماثيل بشوارع بغداد. فتحت برنامج الوورد. وقررت اكتب شي خاص لعلمي طاهر. كتبت بسم الله الرحمن الرحيم. صفت دقيقة، وبعدها، شطبت باسم الله، وبديت اكتب:

تقرير من ساحة التحرير.

اسم الناشط: ضياء النواس.

التحصيل الدراسي: خريج كلية الفنون الجميلة، قسم التصميم.

المهنة: عاطل عن العمل.

ضياء أبوه مكتول بالحرب الطائفية. ذابحينه وشامرینه بالمزبلة. عنده أختين، واخ ولد. گاعدين ايجار بجميلة. امه عندها دكان صغير تبیع بيه مواد غذائية. بالكلية، ضياء چان شاطر ومتفوق. وكل أصدقائه الي يعرفونه، چانوا كلش يحبونه، ويمدحون باخلاقه، ويگولون عليه چان مبدع، والاستاذة والطلبة كلهم يحبونه، وچانو يتوقعون له مستقبل چبير. من ااتخرج، طبعاً ماكو تعين. اشتغل بمخبز، وبالشورجة يبيع جگایر، ومحل حلاقة، ومطعم كباب.

ضياء وسيم، شاب حلو يخبل. مربي لحية خفيفة، وكلش هادئ، وصوته حلو من يغني، وچان يكتب شعر، وچان يصمم شعرات المظاهرات. مرات تلگاه بالساطر الأول مال التظاهرات. ومرات وية المسعفين. ومرات وية الفنانين يرسم بالنفق. تقربت منه وصار صديقي، طبعا چنت كلش فرحان لان هو چان يحبني ودايما يخبرني من يحتاج شغله، وچنت أحس بانه هو الچبير واني الي أصغر منه.

ضياء مشارك بكل المظاهرات قبل الثورة. من المالكى الى عبد المهدي، ومسجون أكثر من مرة. صحيح ضياء مرات يشرب بيرة، بس هو مو سكير، وهو أشرف من الي يصلون ويحچون ويزورون ويلطمون ويوگون بفلوس اليتامى ويتاجرون بدم الشهداء.. أشرف من الي يخلون اغنى بلد بالعالم يصير ذيل لإيران وتابع. بلد ماعنده كرامه. بلد ما تفتهم كلشي منه. لاهو تابع، لاهو ديمقراطي، لاهو إسلامي، لاهو دكتاتورية، لاهو علماني، ولا هو وطن!!

ضياء يريد وطن، والأحزاب الإسلامية ما تريد الوطن، تريد الكراسي والمناصب والوزارات والمليارات. ضياء يريد مدارس وصحة وشوارع ومناطق نظيفة. الأحزاب تريد تعيش بالخضراء وسفرات وسياحة وقصور. ضياء يريد يعيش حر، هم يريدون يعيشون عبيد لإيران والسعودية وامريكا.

كل خيانة ضياء هو انه يغني بساحة التحرير بحب الوطن. كل جريمته شايل ايده بغضب ويهتف بمظاهرة سلمية. وكل جرائم الحكومة واحزابها الفاسدة ما تنعد، ولا تنحسب، والتاريخ فد يوم راح يحاسبهم ويخليهم خالدين للأبد بسجلات العار. كل جريمة

ضياء، هي انه درس وتعب واجتهد وحلم يطلع كل ابداعه، حتى يصمم للعراق، شوارع وحدائق وبنيات ومنتزهات. وكل الي انطيتوه له، انتم، أحزاب الخيانة والعمالة، البطالة والخوف، وذبحتو ابوه بحربكم الطائفية.

وأخيرا تخطفون ضياء من التحرير، وتكتلوناه. بس چم واحد لازم تكتلون، وچم ضياء وضياء بالعراق تريدون تذبحون. أنتم نايمين ورجليكم بالفساد! كل الناس تعرف الشعوب عمرها اطول من الحكام. واذا صدام انتهى بالحفرة، انتم راح تنتهون ب بلاليع الخره، بالمجاري راح ينتهي تاريخكم وسيرتكم.

ضياء الي كتلتوه، هو مو بس انسان من دم ولحم. ضياء فكرة وحلم. ضياء الي اغتالته مسدساتكم، ما يموت! ضياء هو الطفل الي نولد هسه، مثل ما خلقه الله، انسان حر، ماتقدر طائفيتم المريضة، ولا فسادكم الجايف، يوغف بوجه. ضياء صار ألف ضياء وضياء. مثل قصص ألف ليلة ولية، ضياء، تخلص الي الابد.

چنت اعرف الي كتبتة مو تقرير، هو مثل استقالة من احباب الله. وچنت متوقع يطردني من المكتب. وفعلا بعد ما قره التقرير، سحب التك تك مني وگلي: روح دبر نفسك. والحچي الي كتبتة بالتقرير، دير بالك تسولف بيه، تره والحسين أبو عبدالله اسويك وصلتين.

چنت كلش فرحان من طلعت من المكتب. وچميت فعلا من كل گلبي بعد ما يدزون علي، وحتى اذا رادوني بشغلة مرة ثانية مستحيل راح ارجع. شني يعني، بالگوة لازم تصير جندي من جنود احباب الله، حتى الجندي تنتهي خدمته ويسترح. مشيت بين الناس

وكلي نشاط وحماس. رحت اكلت بقلاوة بالسوگ. واشتریت سوتیانات لكریمة، اسود واحمر وایبض. چنت متوقع شراح تگول من تشوفهن. گالت كریمة ((شني بلبل، هاي ألوان العلم العراقي)) وضحكت. گتلها ((گدریهن، وهو الصدر شیلوگ له غیر الوان العلم العراقي!!)) چنه وحدنه بالقرفة، گدرتهن واحد واحد، وگالت، ناقصهن بس كلمة الله أكبر. بست صدرها، كل ماچانت تغیر لون، وانی اصیح، الله أكبر! انوب بالفحصی گلت (صدرک حیبی هو اعز علم یرفر في حیاتی.. وزیدینی صدرا زیدینی، یااحلی نوبات جنونی) ضحکنه، ولحسنه ومصینه بعضنه، وخرنه، وخلصنه، وغفینه.

رجعت لساحة التحرير حر من دون احباب الله. ساعدت بكلشي، بالتنظيف وبالطبخ وبكتابة الشعارات وبالتهافتات وبالفرح وبالحزن، وصارت تعليقاتي بتوتير، كلها بخدمة ثورة التک التک والثوار. بعدین طلعت براسي فکرة، چان اکو ولد ناشط دائماً بالساتر الأول بكل المناطق والمواجهات. بالخلاني والسنگ والتحرير. وچان الولد، والي اسمه مراد، یصور لايف ویسولف عن الثورة. چان خوش زلمة سبع، وعنده الاف المتابعین داخل العراق، وبره. گتله، ارید طلب واحد منك، ارید اصورك بتلفوني، واتابعک بكل مکان تروح بیه. اصورك من تبث مباشر، ومن ترتاح، ومن تهجمون علی الشغب، ومن تدافعون. یعنی اصور كل یومیاتک بالثورة. ما قصر مراد البطل، ورحب بال موضوع، وگلي لازم تلبس خوذة، ودير بالك. گتله، شعجب انت ما مهتم، ولا خوذة ولا قناع، وچنک طالع سفرة؟! گلي، لاتخاف علي، آني عندي خبره. گتله، شني چنت جندي لو قوات خاصه؟ گال بعدین، فد یوم، تعرف السالفة.



المهم فد يوم صارت هوسة بالخلاني، وكتلوا ٧ شباب من  
جماعته. صورت مراد وهو ينسحب، وچان مقهور، ويحجي بعصية  
على ايران والميليشات والأحزاب الإسلامية.

بعد يوم اجاني مراسل قناة العربية، وگلي سمعت انت چنت  
بالخلاني وصورت. گال ممكن أسوي وياك مقابلة ونعرض الفيديو  
مالتك. اكيد، گتله. چنت اريد العالم كله يعرف جرائم هذول  
الذبول. وفعلا، سوه مقابلة وياي عن الهوة مباشر، طلعت كل الي  
بگلبى وحرگتي. وبالنشرة الثانية، عادو المقابلة، وبثو الفيديو الي الي  
مصوره، والي، يحجي بيه مراد عن ايران والأحزاب الإسلامية.

من رجعت بالبيت وگفت سيارة بصفى، نزلوا ٣ مسلحين ملثمين  
وصعدوني للسيارة وشدو عيوني. چنت متوقع ان يخطفوني وچنت  
مستعد لهاي اللحظة. وهواي من الثوار والناشطين چانوا يعرفون،  
اذا ما ينكتلون، ممكن ينخطفون ويتعذبون. طلبو مني ان انزع  
ملابسي، وبقت عيوني مشدودة، وانوب انطوني دشادشة. حققو  
وياي، وما چان اكو أي ضرب ولا تعذيب. بس فشار ومرات صياح  
وتهديد. وسالو عن كم ناشط عدنه بالمظاهرات، وعن التمويل،  
ودور أمريكا، وشنو سالفة الجوكر؟! وهواي أسئلة غبية، معشعشة  
بروسهم، يتخيلونها ويؤلفونها، من عقولهم المريضة. رادو مني ان  
انطيهم حالات اغتصاب وسكر بالتحرر. بقيت يهم، أربعة أيام.  
چانوا ينطوني اكل، وحققو وياي بس ليلتين. ورابع يوم طبو علي  
اثنين، وشالو الوصلة من عيوني، بس هم بقو ملثمين. گالو، انت  
طلعت من جماعة احباب الله، شعندك وية هذول الجوكرية؟  
سألتهم، وأنتم منين؟! جيت اگول ، ميليشات وقعة مو! بس خفت،

وردت بس اطلع، وارجع لكريمة، وچنت مشتاق كلش لبنتي حوراء. گلي واحد من المثلثين، عمي السيد نفسه موصي عليك! اجت سيارة واخذتني ووصلتني للبيت. كريمة خطية فرحت كلش، وچنت، وحلفتني، بان أبطل من روحة التحرير والمظاهرات. ثاني يوم اجت سيارة من مكتب السيد القائد واخذوني وياهم. بقيت انتظر گاعد بغرفة وحدي أكثر من ساعة، الا ان طب السيد علي وحده. وكفت آني، وكعد السيد وگلي، اكعد بلبل. وبعدين گال، اتصلت بعمك طاهر وفهمت منه شغلتك والثورة والتك تك، وشلون بطلت، لان انت زمال أصلي ما يصير لك حل! انت عبالك العراق بيقه لو ما جيش احباب الله؟! بعدين گلي، ارید تحچيلي كلشي شفته بالتحرير والمظاهرات من اول يوم ما طبيت هناك الى اليوم الي خطفوك بيه. سولفت له كلشي بكل امانة. وچان السيد متأثر، ومرات چان يتسم، ومرات يهز ايده وضايچ. يعني باختصار، ما فهمت شنو موقفه لو مشاعره من الثوار. قبل ما يطلع من الغرفة سألني، اذا اعرف اخبار عن زينب؟ حلفت له بالعباس، ما متصل بيها، ولاحاچي بالموضوع من يومها. گلي، زينب تزوجت من إيراني يشتغل بالسفارة، وگبل ما يطلع السيد گال، صير عاقل بلبل، ارجع لمرتك وبنتك، واسمع كلام عمك طاهر!

سوت كريمة چاي، وكعدت يمي تمشط بشعر حوراء. چنت ابوع على الاخبار. طلع تقرير عن مواقف السيد من المتظاهرين، واتهام بعض الثوار لجماعة احباب الله بالاعتداء عليهم. فتحت اللابتوب مالتني. وبديت اكتب.. واكتب... وبقيت سهران وحدي، مرات اكتب، ومرات اتحسر مثل كريمة.. العراق مو مال صفنات وتفكير.. العراق مال حسرات.. وكتبت...

لا ورب الراقصات

الشعب فات فات وبذيله ألف ملف و ملفات

لك ما تلحگ تنهزم ولا الراح ينسي ولا فات

دم الشيد برگبتك ملفوف يا عار لقات ولفات

لا يا ذيل لا يا مرگة عدس لا يا خياسات

ولك تلطم على حسين.... وترفع الرايات

رايات ملطخة بالعمالة.. مخزية العمامات

لا ورب الراقصات



## كورونا البلبل

هذي المرة، آني رححت برجليني لمكتب احباب الله، واتطوعت للشغل وياهم. مو لان نسيت منو هم، ولو آني ما اعرف شنو حقيقتهم! بس انتشر كورونا، وچان المكتب عدهم معقمات، وشكلو جماعات للتعقيم بقطاعنا، والقطاعات الثانية. وهذا عمل خيرى لخدمة الناس، وحتى نحافظ على حياة أهلنا وناسنا الفقره، گلت لنفسي، ورحت حچيت وية عمي طاهر.

لبست بدلة الوقاية البيضة وية أربعة شباب، وعلى ظهورنا جليكانات المعقمات، وبدينا نفتر، بالدرايين والسوگ، نرش ونعقم. چنه أربعة، آني وسعد ومازن وصفاء. فد يوم چنا نرش السوگ، من گال سعد، شكلنه يشبه فلم صيادين الاشباح. ما چنت شايف الفيلم، دورت عليه بالننت وطلعنه صدگ، نشبهم. هم يصيدون اشباح، واحنا نحلم نصيد فايروس كورونا ونكتله.

من تعيش باي مكان بالعالم، تتعود عليه. يعني يصير عادي بالنسبة لك، وتنسه التفاصيل الي متكون منه هذا المكان. باختصار چان قطاعنه والمدينة، واقع حال، يعني هي هيچ تعبانة من يوم ما الله خالقها، مثل واحد عنده مرض بالولادة. بس من بدينا نفتر بالدرايين، صفناقي فتحت الجروح القديمة والجديدة. چنت أحس احنه نضحك على نفسنه، واحنه نرش المعقمات فوگ الزبالة والخيسه بالاسواق الشعبية التعبانة. لو شاحنات كاملة مال تعقيم

ما راح تكفي، مو حتى تكتل كورونا، بس حتى نعقم كل هاي اكوام  
الوصاخة والزبل، والي متروسه امراض وفايروسات. نحتاج أولا مبيد  
حشرات، خاص بالفساد. نحتاج نعقم العقول الي لازمة البلد، والي  
وگعته بالضربة القاضية، بعد ما كان صدام مشبعه ضرب وكفخات،  
بسوادين حروبه. المجتمع العراقي مناعته ضعيفة، والجهل هو  
المرض. وأخطر فايروس هو استخدام الدين، مثل ما هتفو ثوار  
التحرير (باسم الدين باگونا الحرامية). مو بس باگونا، باسم  
المقدسات، رجعونه ميت سنة وره. باسم الدين والمذهب، خلوه  
عقول الناس تنسه احنه عايشين بهذا القرن، الي الناس ماتلحگ  
بيه حتى تفتهم كل اختراعاته وتقنياته. العلم وين طنبورة وين؟!  
مازن چان يگول، كورونا مؤامرة أمريكية. وسعد يگول لان  
بالغرب الزلم تنيچ وفروخ، انتشر هذا المرض مثل الايدز، لهذا  
يگولون دوه الايدز يفيد مرضى الكورونا. اما صفاء يگول لازم ما  
نعقم ونرش، نحتاج بلوك للمناويچ بالمنطقة، والي صايرين هواي  
بالمدينة وبغداد وبكل العراق. سالي مازن، شنو رأيك انت ببلبل؟  
گتلهم، اذا بيكم واحد يجاوبني اول شي، شنو يعني فايروس؟!  
مثلا شنو فرقه عن البكتيريا؟! مازن گال، ببلبل هسه شنو انت  
مسوي روحك تفتهم. هن كلهن، بكتريا فايروس، امراض. گتلهم،  
زين سؤال أخير، الي يموتون بکورونا تصير هواي مشاكل عدهم  
بالرئة، اكو واحد منكم يفتهم شنو الرئة، منين متكونة، شلون  
تشتغل؟ سعد گال، حبيبي ببلبل هاي شغلة الطبيب. گتله، زين  
حبيبي سعودي بشرفك، انت ما تعرف شنو الفرق بين الفايروس  
والبكتريا، ولا تعرف الرئة الي بجسمك شلون تشتغل ومنين متكونة،  
شلون راح تفتنح بمليارات الناس بالعالم الي تحاول السيطرة على

الفايروس وخايفه منه. اكيد انت راح تحتاج واحد يلقنك نظرية مؤامرة وشذوذ جنسي وفروخ، حتى ترتاح وماتعب نفسك وتدور وتتعلم. صفاء غال، السيد نشر دعاء المرض والوقاية بتوتير، اقراه سبع مرات باليوم، ومراح يجيك المرض. كتله، چا ليش نرش بهاي المعقمات، خو نرش ادعية على الناس!؟

حسيت ضاجو مني، وچنت متاكد النقاش، وية عقول مسكينة، متريية مزرعة الخرافات، ما راح توصل الى أي نتيجة. رجعت للبيت. كريمة گالت لي، گبل على الحمام. چانت لابسه چفوف، وتنظف بالبيت. كريمة چانت مرعوبة وخايفة من كورونا كلش. داخلة انذار، وچانت ٢٤ ساعة تنظف وتغسل كل شي، البيت، المسواگ، السطح. كتلها، كريمة يعني احنه العراقيين لو طخه لو طلع مخه. لو ناس مستهترة بالفايروس ويضحكون على الوباء، لو ناس مثلچ داخلين حرب. علكيفچ حبييتي! گالت لي، محسن، هس انتة عفت كل الشغلات بالدينا، وتفت بالدرابين بهذا الوكت وتعقم. اذا انعديت، الله لا يگوله، راح ننعدني اني وحوراء، وهذا مرض ماينعرف راسه من رجليه. گلت لها، أولا الأطفال مناعتهم زينة. واحنه هم بعدنا شباب، ما ندخن، واكلنا زين، انشاء الله ماكو شي.

من شهر تقريبا، بديت اسهر هواي، وصعب انام. ما أدري قلق، ما اعرف من شنو بالظبط. بس أحس دائما اكو شي قالقني. نامت كريمة وحوراء وبقيت سهران وية اللابتوب. طفيته وصعدت للسطح. گعدت على كرسي، بنص السطح، وبقيت أفكر بحالنا العراقي. حزب البعث من اخذ السلطة هجج الناس كلها. بطش بيهم كلهم، قوميين وإسلاميين وشيوعيين، وحتى البعثيين نفسهم ناچ

عرضهم. الاحزاب الشيعة الي راحت الي ايران، تربت هناك وكبرت وتعلمت وصارو جنود يحاربون تحت راية الخميني. يعني باختصار چانوا يكتلون بجنود عراقيين وهسه يحكمون العراقيين. او كي نضال وجهاد! والشيوعيين، راحو وختلو بالدول الراسمالية، الي چانت كل شعاراتهم ضدها. شيوعي لاجئ وگاعد جوه علم راس المال. والله يالله! الدنيا تضحك، مدري تبچي! الشيعة بداخل العراق، احنه، المغضوب عليهم، غير قصة. بقينه بالعراق، واكلنه خره بالحصار الاقتصادي. ومن طلعه انتفاضة ضد صدام بسنة ١٩٩١ سمحت أمريكا، أم الرأسمالية، للدكتاتور ان يطير طياراته ويزحف بجيشه حتى يخمد الانتفاضة، ويحفر مقابر جماعية. يعني أمريكا مرة سلمت شيعة العراق لصادم، ومرة ثانية سلمت شيعة العراق الي چانوا بايران السلطة. خوات الكعبه يلعبون بالعالم بكيفهم! يعني هسه بشرفك، الأحزاب الإسلامية بشعاراتها ونهجها الي على اساس ضد أمريكا الشيطان الأكبر، مو هم نفسهم دخلو وية الدبابات الامريكية. زين هسه عوفك من هاي السالفة! شنو انجازاتهم من سنة ٢٠٠٣ لليوم غير حرية اللطم والزيارات والبچي. طبعا حرية تعبير انسه، بوست واحد بالفيس لو تويت راح تختفي من الوجود. بس اريد افتهم شنو انجازاتهم. خلوا أيديهم بيد الفاسدين من الاكراد والأحزاب السنية على طريقة النموذج الديمقراطي الأمريكي في العراق!!

أولا شعلو حرب أهلية طائفية ما چانت ترحم لا الصغير ولا الجبير. وجروحها مراح تطيب بسهولة وراح تبقى فترة طويلة بذاكرة العراقيين. زين، والفساد والبوگ. أكثر من ٥٠٠ ميار دولار اختفن من يوم سقوط بغداد، وهاي إحصائية قديمة قبل كم سنة. هي



وين تلحك الاحصائيات وياهم! وبسبب سياستهم الطائفية الخايسة فتحوا الابواب لكل دول العالم حتى تدخل بينه. ايران والسعودية والخليج وتركيا، وياهو اليجي يدخل بالعراق وينيچ عرضه. الى ان وصلتته طائفيتهم وفسادهم لسقوط مدن هواي بيد داعش. واغتصاب وتهجير وجرائم وحشية. والى يومك هذا، ولا وزير ولا مسؤول أمني جبير او صغير، تحاسب على سقوط مدن العراق بيد داعش.

بعد شنو انجازاتهم، بس حاجوني! البطالة، وصلت مستويات ماينحجي بيها. يعني نص شباب البلد عاطلين عن العمل. وطبعا أكثر من ثلث ارباع نسوان العراق عاطلات عن العمل بسبب التقاليد والمجتمع، واخلاق جماعتنا الأحزاب الإسلامية. الاقتصاد واگع ومنتهي. الصناعة ميتة. انهيار البنية التحتية. الزراعة، انتهت، وحتى المخضر استيراد. مشاكل امنية ماتنعد، عصابات ومافيات وجرائم. دولة اللاقانون، والعشائرية والقبلية والمذهبية رجعت بقوة. المي تلوث، البيئة تدمرت، والكاع يبست. التبعية والعبودية لإيران ودول الجوار. وناس قليلة بسبب الانتماء الطائفي حصلو امتيازات وفلوس وبيوت، لان شنو چانوا ضد الديكتاتور! وأعضاء برلمان صارو من اغنى الناس بالعالم. استولوا على أملاك الدولة. وسيطرت الأحزاب الإسلامية على السفارات والوزرات والشركات والاموال وعلى كل أمور الدولة. يعني ماكو هيچ سفلة، لا بتاريخ العراق الجديد ولا القديم، مثل أحزاب الطائفية هذول الكواويد!

بعد أسبوعين من شغلي وية جماعة التعقيم. حسيت شوية بگحة كلش خفيفة وشوية تعب. اكيد قلت. بس ما اردت اخوف

كريمة وارعبها ازيد. گلت، يمكن من التراب والوصاخة بالقطاع. بس مرات، الانسان يكابر وتصير عنده ثقة أكبر من حجمه، لهذا يبقه يقشمر على نفسه وعقله، الى ان يوغع بحفرة، الله نفسه بعد ما يگدر يطلعه منها. بعد چم يوم، صخت كريمة، حرارتها صارت كلش عالية، وخوفها بان صار بيها كورونا، هد حيلها بسرعة، وخله جسمها كل يرجف. خابرت اختي زهرة، واجت گعدت يم حوراء. اخذت كريمة للمستشفى بتكسي. اخذوها فحوصات، وطلعت النتائج. كريمة بيها كورونا، وگالو، خليناها بالحجز. سألني الطبيب منو عدنه بالبيت مختلط بكريمة زوجتي. گتله عندي بس بنتي حوراء. سألني اذا ما آني او حوراء نحس باي اعراض. گتله، ما اعتقد، ماكو شي! گال للاحتياط، جيب بنتك باچر وخلي نفحصكم، حتى نتأكد!

چنت مصدوم، عبالك واحد ضاربنيه بتوثية على راسي. رجعت للبيت وگلت لأختي زهرة، لازم ترجعين لبيت خالي، يمكن آني وحوراء هم عدنه كورونا، وتنعدين. گالت، وحتى اذا عدكم كورونا، شلون بالله كريمة بالمستشفى، واعوفكم وحدكم انتة وحوراء. گتلها خوية، حوراء آني ادير بالي عليها. الله يخليچ، ارجعي لبيت خالي، وديري بالچ على نفسچ.

چچيت بالليل بالتلفون وية كريمة، وما چنت أدري شگول، خلصنه التلفون بچي. ثاني يوم رحتم للمستشفى وفحصنه وطلعت نتائجنه، آني وحوراء هم بينه كورونا، بس ما عدنا اعراض. گال الطبيب، عادي هواي ناس ما تصير عندها اعراض، وانشاء الله تطلعون من المرض، انت وبتك قريبا. بس لازم تحجزون نفسكم

بالبيت. واذا حسيت حالتكم صارت مو زينة، لازم تجي للمستشفى.  
كلشي ما صار بينه آني وحوراء. ما حسينه باي اعراض. بس آني  
چنت شوية اكح خفيف. وبعد ٤ أيام، تعبت كريمة كلش وخلوها  
على جهاز التنفس. خابرت الطبيب وحقيت وياه. گال، كريمة چانت  
عدها أصلا مشكلة بالرئة، هي من الامراض الي الها علاقة بضيق  
التنفس. حقيلته على حسرات كريمة. گلي، أي هاي مو حسرات،  
هي چان عندها ضيق بالتنفس، وچان لازم تفحص من زمان. گلت  
للدكتور، يمكن احتمال آني عديتها بالفايروس، وحقيلته، شلون چنت  
أفتر بالدرابين والأسواق، اعقم. الدكتور گال، كلشي ممكن!

بقيت وية حوراء بالبيت. تخابرنى زهرة كل يوم وعمي طاهر هم  
يخابرنى، والگرايب والأصدقاء. كريمة بعد ما تگدر تحچي بالتلفون.  
چنت أحس بالذنب، وخايف، وصارت الدنيا سوده بوجهي. شگد  
غبي آني، وتافه وجبان. حسيت بنفسي مجرم، وضربت كريمة بسچين  
بظهرها. چانت هي حاسة وخايفة، وآني واحد جايف وناقص. بقيت  
ابچي وادعي ربي يخلص كريمة من هاي المحنة.

بيوم العاشر من الحجر، آني وحوراء بالبيت، خابرونه بالليل،  
ماتت كريمة. وگالو لازم، ما اطلع من الحجر الصحي، وهم راح  
يرتبون دفن كريمة وية ٣ عجايز ميتات بالفيروس. طبعا رفضت  
وضليت اصيح عليهم. حذروني من ان اطلع من البيت، والطبيب  
حاول يفهمني خطورة دفن شخص ميت بالفايروس. تخبلت وبقيت  
احچي بالتلفون ويه كل الي اعرفهم. چنت اريد واحد يگلي، محسن  
هذا قدر، وانت مو مذنب! خابرنى عمي طاهر وگلي، انت وبتنك  
مرضه هسه. بس قابل احنه نعوف بنتنه يدفنونها اغراب، آني

واخوة كريمة، رايحين ندفنها. ابقه يم بنتك ودير بالك عليها.

ماتت كريمة، ومات الدنيا داير ما دايري، وحسيت اريد اختفي مو بس من المدينة، من العراق كله. من تشافيت آني وحوراء من الفايروس، سوينه فاتحة صغيرة بالبيت على غد المعارف. حجه وياي عمي طاهر، وكلي اذا تبقى هيچ وما تآكل، راح تموت وتصير بنتك يتيمة. من غال كلمة يتيمة، كرهت عمي طاهر بعد أكثر، الي أصلا آني كارهه هو واحباب الله. وهو عمره ما چان مهتم بينه، وخالي هو الي تكفل بتربيتنه آني وزهرة. عمي چان مشغول ييوس بيد السادة. اتمنيت اخنكه بيدي وأخلص منه. بس بقيت ساكت، وصابر. گلي، محتاج شي قبل ما اروح؟ گنله، اريد اطلع من العراق! غال أي هاي سهلة. شلون؟! سألته. غال، السفير الي بالسويد من احباب الله. راح أرتب لك شغلة هناك بالسفارة. ترتاح لك فد سنة وترجع.

وزوج الي يرجع! رتبو لي جماعة احباب الله تعين، مستشار ثقافي في سفارتنا بالسويد. طرت، واني مجروح وروحي محروگه، على موت كريمة. بس گلت لنفسي، على الاقل تخلص بنتي واطمن مستقبلها، وتتنفس هوه نظيف، وماتعيش كوابيسي الي عشته بالعراق. چنت مخلي خطة كاملة براسي. بقيت وياهم بالسفارة، اجرولي شقة، وچان عندي راتب كلش زين. وماچان اكو أي شغل او نشاطات ثقافية، بسبب الكورونا. وچنت أخلص وكتي گاعد بالسفارة، گدام الكمبيوتر، على اساس أسوي مشاريع ثقافية مستقبلية. بس چنت ادور وابطح واجمع وثائق تخص كل اسرار احباب الله. وچنت اتصل بالمعارف والأصدقاء، ونبشت عظام اجداد قادة احباب الله واحد واحد.

چنت ناوي اطلب لجوء، بس چنت لازم أخلي خطة زينة، ولازم القضية مالتى تكون قوية حتى يقبلون لجوئي، لان آني جاي رسمي للسويد واشتغل بالسفارة. ومن تجمعت عندي هواي معلومات ووثائق عن احباب الله من أيام الطائفية. رحى وقدمت طلب لجوء. حچيت كلشي. عن دور احباب الله فى الحرب الطائفية. القتل والخطف. مناطق تخزين الأسلحة فى بغداد. العلاقات مع بقية الميليشيات. والفساد والوزراء والمدراء، والخمط. ودورهم فى مراقبة الثورة والاعتداء على المتظاهرين. طول فترة التحقيق وياي بدائرة الهجرة، حسيت بهم، يريدون يتأكدون من المعلومات الى اقولها. بهاي الفترة طبعاً عفت الشقة الى اجروها لي جماعته بستوكهولم، وأجرت بمدينة مالمو شقة صغيرة، محد يعرف مكانها، وبقيت انتظر نتيجة طلب اللجوء.

بعد ست شهور، قبلو طلب اللجوء مالتى، وبده شوط جديد بحياتي. چانت اكو غابة قريبة من شقتي. چنت اخذ حوراء ونروح نتمشى. اختاريت شجرة حلوة وغريبة، شوية منعزلة عن بقية الأشجار. وقررت ان تكون الشجرة هي روح كريمة، قبر رمزي، شمعة حب سرية، نجي نزورها آني وحوراء.

چان عندي وقت هواي، وبديت اصفن أكثر من اللازم بكل الى صار بحياتي! ودخلت بكآبة قوية، وبديت ما انتبه لِنفسي ولحوراء. خفت ما اگدر ادير بالي على حوراء، لهذا قررت اروح لطبيب نفسي. طلع مو سهل تحصل طبيب نفسي بالسويد. المهم حچيت اولاً للممرضة حالى، حچزت لي وقت مع طبيب نفسي. بعدين، كتب لي الطبيب حبوب كآبة. وبده يقدم لي نصائح، وطرق علاج

للخروج من كآبتي. سألني الطيب عن الهويات الي أحبها؟! كتله،  
ما عندي هوايات، بس اصفن هواي، ومرات أحس اريد اكتب.  
كلي، وهذي أفضل طريقة للعلاج النفسي! اكتب كلشي، وفرغ الي  
بداخلك، وخلي الكتابة تكون صديقك المقرب، اكتب من من دون  
ان تخاف او تتردد او تشعر بالذنب.

## بلبل الكاتب

كبرت حوراء وبتت تروح للروضة. چنت كلش فرحان، وتمنيت كريمة تشوفها، شلون چانت مثل الوردة المفتحة، وهي تمشي وياي للروضة، وتبدي اول خطوة بمستقبلها.

استقرت حياتي، وصارت هادئة، وچنت كلش مستمتع بالحياة بالسويد. واهم شي چان بالنسبة لي اثنين، الهوه النظيف والحرية. اشكال وأنواع والوان من الناس. كل واحد يسوي الي يحبه من دون ان يتدخل أي شخص بحياته. الي يريد نايت كلوب، هاذه هو النايث كلوب. الي يريد يصلي، ذيج هي الكنيسة والجامع. الي يريد يشرب البار موجود. الي يريد اكل حلال، هاي هي المطاعم تارسة السويد. اكل واشرب واحچي وصلي وارگص ونام واگعد وفكر بكيفك! انت انسان حر، وهذا الحق المقدس، مو من السهل يجي أي شخص يصادره منك لو يلغيه. القانون فوق الجميع، مثل مايگولون. من چنت اصفن بالشعب السويدي، الي اغلب ناسه مالمهم علاقة بالدين ولا يحچون بيه، چنت اسال نفسي، منو رب السويد مثلاً؟! وأخيرا صار واضح ألي، الله هو القانون بالسويد. أكثر الاوربيين والسويديين، يعبدون القانون! الله مالتنه هم قانون، بس الفرق، الله قوانينه واحكامه وشريعته مكتوبة بزمن قريش، وما تغيرت الى اليوم، ومحد يگدر يتقرب منها او يغيرها، لان قوانينه مقدسة. بس الله مال السويد، واقتصد القانون، هو من صنع البشر، ويگدرون يغيرونه ويطورونه، بعد ان يتشاركون سوية بالتفكير شلون يجددونه، بس

شي واحد ما يتغير، احترامهم وحبهم والتزامهم ب القانون، والي هو أعظم مقدساتهم.

مرت الأيام، بسيطة من دون عواصف ومفاجئات. وتعرفت على بنية كلش حبابة وحلوة سويدية تشتغل بكافتيريا، اسمها ايملي. حبت حوراء كلش، وحوراء هم ارتاحتلها، وچانن يرطنن بالسويدي بسرعة، ومرات ما الحگ افتهم شيگولن. چانت سويدتي تعبانة، بس بديت اطور إنكليزيتي الي تعلمتها بأيام بلبل السيد. بقت ايملي تجي مرات تبات يمنه، ومرات انروح نزورها بشقتها. تطورت علاقتنه بسرعة، ومرة گالت لي اريد اصير ام لحوراء. فرحت كلش، وگتلهآ آني ما شايف بحياتي مثل هذه الرقة والصدق والحنان. وبدت ايملي تهتم وتساءل عن حوراء، وطبعا تداري ابوها همين! وفد يوم اقترحت نروح سفرة للمغرب ل اغادير. بقينا أسبوع، كان من أجمل ٧ أيام بحياتي كلها. اكل طيب مغربي يخبل، حبيت السمچ، والي عدهم منه أنواع كلش هوآي، وشمس وبحر، وحوراء تونست وحببت البحر. واني استمتعت بحب وبجسم ايملي الخرافي. لعبنه وضحكته وتونسنه، واخذنه صور كلش هوآي.

رجعنا للسويد! ايملي راحت لشغلها، وحوراء بروضتها. وبقيت آني بالبيت. چان الموضوع الصعب والي قالقني، هو شلون احصل شغل بالسويد. الشي الوحيد الي ما تغير بحياتي هو صعوبة ان استقر على شغله. يعني شلون الگه شغله أحبها واعييش منها. انوب السويد بلد مثل مانگول محترف، واني ما عندي مؤهلات، لا صنعة، لا شهادة جامعية، لا خبرة. شنو خبرتي آني بالحياة مثلا، خبير بكلاوات احباب الله!؟



اخذت فد يوم صفنه زينة، وقررت ان احقق امنية چانت  
بداخلي من زمان، وهي ان اكتب عن صفناقي. خاصة والطبيب  
النفسي مالتى شجعني على الكتابة. بس اول شي لازم اقره قبل  
ما اكتب، وافتهم الادب والكتابة. بديت انزل من النت عشرات  
الكتب. ادب عالمي وعربي وعراقي. كتب فلسفية صعبة ما فتمتها  
زين. اجتماع وعلم نفس، كتب كلش مثيرة ويحتاج قراءة أكثر  
واكثر بهاي المجالات. بس لگيت نفسي وية القصص والروايات،  
والشعر مو كلش حبيته! القراءة تگدر تگول صارت لي مثل السفينة،  
وبدیت اسافر بيها كل مرة الى جزيرة، وصرت رحال مثل السندباد،  
واني اتعجب وافرح واحزن واتحمس، واني اتنقل من قصة الى قصة،  
من دنيا الى دنيا. وبدیت افهم شنو الحوار الي بداخل الوسط  
الادبي العربي. دور النشر والفساد والقرصنة والرقابة. شفت مقابلات  
ووئائقيات عن كتاب من كل مكان بالعالم. وصارت لي شوية معرفة  
بسيطة بأمر الادب. بعد شهور حسيت صرت انسان جديد. حسيت  
نزعت جلد قديم ومتخلف، وصار عندي جلد شاب جديد. بس من  
حسيت آني صرت جاهز للكتابة، طلعتلي المشكلة القديمة الجديدة.  
وچان طبعا السؤال الي یرن براسي هو، ليش ما نكتب روايات  
وقصص باللهجة العامية؟!

بالسويد سديت توتير مالتى القديم، وفتحت فيسوبوك، وبدیت  
بالفترة الأخيرة اطلب واقبل صداقات الكتاب والناس المهتمة بالأدب  
والفن والفكر. وچان الفيس بوك أفضل طريقة حتى افهم شنو راي  
اهل العلم، بمسالة كتابة رواية بالعامية. كتب بوست: ((شنو رأيكم  
بكتابة رواية باللهجة العراقية؟)) اجت هواي تعليقات، بعضها  
يگول، هاي تجربة فاشلة واللهجة العراقية خشنة وماتگدر تعبر

بشكل جيد. رديت آني، يعني اللهجة العراقية، الي من مئات السنين، الناس تحب وتتغزل بيها وتتفاهم بيها، ماتقدر تعبر؟! شوية غريب هذا الموضوع. زين شلون احنه نتواصل بيها ونعبر عن نفسنا ونحب ونكره بهاي اللهجة الي ما عدنه غيرها. اكو ناس علقنت وگالت، مجربين گبل، مثلا النخلة والجيران لغائب طعمة فرمان وفؤاد التكرلي كاتيين باللهجة، واكو ناس عددت أسماء هواي روائيين عراقيين جدد وقدامى. جاوبت هاي الناس، وگتلهم، أي اعرف، بس ما كاتبين كل الرواية بالعامية، بس الحوارات. وهواي كتاب عرب يكتبون الحوارات بلهجاتهم. المصريين كتبوا روايات كاملة باللهجة. بس ماكو في العراق كاتب مألّف رواية كاملة، كلها من الغلاف للغلاف باللهجة. يعني مو بس الحوارات، يعني السرد بالعامية.

وطبعا اشتغلت أسطوانة العرب ماراح يفهمون! واكو ناس بكلشي تبالغ، وتحجي بكيفها، وهي ما فاهمه أصلا شنو الموضوع. بس تريد تنطي راي. هيچ، المهم يشارك ويرتاح.

اخر تعليق صفتت بيه، واحد گال ((اللهجة العراقية ما راح تگدر تعبر عن الواقع)) كتبت له جواب: چا هي الفصحى الي تعبر عن الواقع؟ الجملة بالفصحى تشبه مبالغة الممثلين المسرحيين من يمثلون بالمسلسلات. يعني من تقره جملة بالفصحى، تحس بيها صوت ونبرة وتشنج عالي. تخيل واحد يكتب بداية قصة بالفصحى ((انفجرت السيارة المفخخة بينما كنت اتناول وجبة الفطور)) يعني هاي الجملة تعبر عن الواقع وبيها صدق، لو من تگول باختصار ((چنت اترينگ، من طگت المفخخة)) اللهجة بيها إحساس وحرارة وصدق، وتحسها طالعه من گلبك، وبيها اختصار فظيخ وخطير.

المهم، بديت اكتب، وعرفت تقريبا وين أصعب مشكلة بكتابة العامية. الي يريد يبدي ويكتب رواية، ماچان گدامه كتب تكون مرجعيات يتعلم منهن. بالشعر الشعبي أسهل بهوای. اكو شعراء كبار ومهمين، وكاتبين مجاميع كاملة، يعني ممكن تتعلم من تجاربهم. بس بالرواية، ماعدا الحوارات، ماكو چم كتاب تقراهن، حتى يكونن لك مثل المراجع، تستفاد وتتعلم منهن. لهذا فكرت، لو الكتاب العراقيين يجربون يكتبون كم رواية بالعامية، وييقون يكتبون بالفصحى عادي، خلي مثلا يجربون كتابة عشر سنوات. راح تصير عدنه مئات الكتب الروائية والقصص، وخلي نشوف التجربة، شنو راح تثمر؟! يعني ليش كل هذا الخوف والرعب؟ طبعا أكثر الناس الي چانو معترضين على كتابة رواية بالعامية هم الكتاب أنفسهم، تحسهم من يعلقون بجدية ويرفضون الموضوع، تگول انت تريد تزلزل عرش الفصحى الي گاعدين عليه.

ما أدري هذا موضوع طويل، والنقاش بيه ما يخلص. المهم، الي چان مخوفني وأفكر بيه بجدية، هم جماعة احباب الله. بس گلت لنفسي، ما اعتقد توصل بيهم الدناءة ويأذون اختي زهرة الفقيرة. وچنت متأكد ماكو دار نشر عراقية او عربية راح تطبع كتابي. لهذا فكرت انشر الكتاب بالنت. حاولت أسوي موقع خاص، بس ماچان عندي خبرة. وتصميم موقع يحتاج شوية فلوس، وشغل تقني ما افهم بيه. اجلت موضوع الموقع، وبقيت اكتب واكتب. الا ان كمل الكتاب وسميته (بلبل السيد)، طبعا غيرت أسماء الشخصيات الواقعية، واسماء بعض الجهات. بالنهاية الكتاب، أي كتاب بالعالم، حتى اذا سيرة، هو يعتبر مخيلة. مو هيچ يگول النقاد؟!

حجيت لصدیقتي ايملي عن الكتاب. وهي صارت أكثر من صديقة، هي اليوم حبيبة، ونفكر نعيش سوية. چنت اموت على ريحة جسمها، چانت كلش تهتم بنظافتها، واموت أكثر على عيونها الي چان يشع منهن طيبة ومحبة كلش حقيقية، نظرة هيچ ملائكية وصافية. المهم، فرحت ايملي بخر الكتاب، وگالت يمكن فد يوم يترجم للسويدي. گتلها، لا ما اعتقد، هو كتاب، تجربة أولى، ويمكن بس العراقيين راح يفهونه. كتاب بسيط! وچچيتها عن صراع العامية والفصحى عند العرب، الي مخلصين حياتهم كلها صراعات وانقسامات، من الله خالقهم حتى اليوم. انوب چچيتها عن فكرة الموقع بالنسبة. گالت ايملي اكو ولد عراقي تعرفه، قبل ما آني اجي للسويد، وهو يفتهم بتصميم المواقع وعنده خبره. راسا خابرت عليه، وسوت لي موعد وياه. اسم الولد، فاضل علي.

بعد أسبوع التقيت بفاضل علي، وسولفنه، وافتهمت هو من جماعة رفحه. چان عمره ست شهور من چان وية اهله بمخيم برفحه، قبل ما يخذونهم السويد لاجئين. ما يعرف كلشي عن الانتفاضة ولا يتذكر المخيم، ويگول بس يسمع من اهله قصص وبطولات. چنت شوية حذر وياه، لان هواي عراقيين باوربا، من المفروض عايشين لاجئين، يعني مهزومين من ضيم العراق وضيم الطائفية والمليشيات والحياة التعبانية. بس اكو ناس ياخذون فلوس ورواتب من العراق، وعايشين حياة الغرب بكل حرية، بس من تتقرب من المقدس لو الحشد لو البدرين والحكيمين، ينگلبون عليك طنائلة. المهم، بس فاضل علي چان مبین خوش ولد، وچان يشرب بيرة. شوية اطمانيت مو كلش إسلامي. بس طبعا هم ماينحزرون، تلگاها يشرب بيرة ويدخن حشيش هنا بالسويد وعايش

وية صديقة من دون زواج، بس دشداشة الطائفية تطلع، وية اول نقاش.

المهم وعدني فاضل، ان يسوي لي موقع. وبقينه نلتقي، مرات. چان دائما يتعذر عن التأخير، لان مشغول. واني ماجنت الح عليه، لان بالنهاية هو يسوي الي شغله من دون فلوس، وامتكرم! بديت اثق بيه وحچيلته عن روايتي، وعن احباب الله وعمي القيادي. وهواي من تفاصيل قصة حياتي. وهو أيضا حچالي عن حياته بالسويد.

چان اكو واحد بحزب سياسي سويدي معروف من أصل عراقي، اسمه حسين أبو الهيل، وهو هم من جماعه رفحه. المهم چان هواي يجذب بالتلفزيون على السويديين، وذاب مشاكل الدنيا كله الي بالعراق، بداعش والسعودية. وچان ابد ما يجيب طاري ايران والمليشيات. فد يوم صدفه چنت گاعد بالحديقة العامة اقره بكتاب، وچان اكو جماعة من التلفزيون السويدي، يسألون العراقيين اللاجئين عن رأيهم بحسين أبو الهيل، السياسي السويدي العراقي. گتلهم بالمقابلة التلفزيونية، أي اعرفه! وشوية حچيت، عن شلون تحول المعارضين في العراق من ضحايا ديكتاتور الى قادة الفساد والطائفية في العراق. گلت، مثلا مثل هذا السياسي أبو الهيل، الي يأخذ راتب هنا بالسويد ومن العراق، راتب مدى الحياة كتعويضات، وهواي امتيازات مادية ثانية، بينما بالعراق اكو ناس گاعده بالخيم لاجئين ومشردين. وحچيت عن شلون أبو الهيل ينافق ومايحچي على دور ايران بالسيطرة على العراق ودعم المليشيات المجرمة.

بعد ايام، طلع التقرير بالتلفزيون. وچانو مسوين تقرير مطول،

مو بس مقابلات اللاجئين. حاجين عن إيران ودعمها للمليشيات الطائفية، وعن رواتب رفحه. ومتطرقين للسياسي أبو الهيل، ومطلعين خياس قديم عنده قبل ما يلتحق بالحزب والسياسة. چان عنده بالفيس گبل، تعليقات عنصرية اشكال وانواع، على الصوماليين والاكراد والسعوديين واليهود. هذا حسين أبو الهيل، خاف عباله السويد مثل العراق؟! ممكن تكون عنصري بالتلفزيون الرسمي مال الدولة، وماكو مشكلة!

بعد چم يوم التقيت بفاضل على، وگلي، شوية بسخرية محسوسة، ها صاير مشهور، تحچي بالتلفزيون وتصرح؟! گتله، فاضل خو ما زعلت، من حچيت على رفحه، والسياسي مالتهم. گال، لا خلي يولي أبو الهيل، آني هم أكره نفاقه، وهو حتى اللاجئين العراقيين كلش يكرهونه، ويگولون ابد ما يساعدهم! وبده فاضل يشرح لي شلون أهله تبهلزو برفحه وشلون صدام اضهدهم. گتله، فاضل حبيبي، كلنه اكلنه خره بزمن صدام. هو اكو واحد ما تعذب. لازم نطي فلوس النفط كلها للعراقيين كتعويضات، اذا نريد نصير عادلين. خاصة الي بقو بالعراق وشافوا الضيم. طبعا فاضل، ماچان مبين عليه منزعج. وحاوول يكمل شغله ويای، بسالفة تصميم الموقع.

ما چنت اعرف هاذه الفاضل حية، مثل بقية حيايا التخلف العراقي باوربا. اكيد مو كلهم، وبيهم خوش ولد، بس هواي منهم، بوجهين وخبيثين. من چان فاضل على أساس يسوي لي الموقع، طبعا ظل يسال معلومات، چم اميل عندي، ومواليدي كاملة، وهواي اسأله، وچنت أحس كلش طبيعي، وهو گال حتى نشترتي دومين

للموقع مالتك، نحتاج معلومات أساسية، وانت بعدين تگدر تدير بالك على الموقع بنفسك. آني خليت ثقتي ب فاضل. وبصراحة من جيت للسويد وفهمت شلون عايشين، نسيت موضوع الجذب والاحتيال. لان السويد مجتمع ثقة وصادق، وصعب تلغه واحد يريد يخدعك لو يچذب. يعني لو الله مالتنه يعرف السويدين، چان دخلهم گبل للجنة، من دون أي سؤال!!

فديو گعدت الصبح، ولگيت حساي بالفيس متهكر. قرصان داخل على صفحتي وكاتب بوست بالصفحة مالتني، تهكرت صفحة البلبل، وقریبا ننشر الخاص مالتنه. طبعا ارتبكت، ماچنت اعرف شلون اتصرف بمثل هاي الأمور. بعد شوية اجت رسالة من القرصان على ايميلي. يگول، ها تحچي على العراقيين المجاهدين، ياگواد اله افضحك! طبعا انصدمت. كتبت للقرصان، وهسه شتريد؟ گلي، اله افضحك وانشر الصور وسوالفك التعبانه. طبعا ماچان عندي أشياء شخصية وسوالف تعبانه، كل الي عندي شويه رسائل شقه وية أصدقاء ومو كلش مهم تطلع للناس، عادي كل العراقيين يفشرون وينكتون. كتبت له، ياصور؟ سكت الهكر فترة. انوب كتب لي، هاي مال البحر، انت وهاي الحلوة المصلخه. فكرت بالموضوع، وچيكت صورنه آني وايميلي. وفهمت قصده. بالمغرب، چنه گاعدين على البحر، واخذت صور انه بملايس البحر. وفديو دزيت ل ايميلي الصور بالماسنجر، وكتبتله مشتاقلچ! خابرت ايميلي، وگلت لها على موضوع القرصان. راسا رجعت بسيارتها للبيت وچانت منزعجة كلش، وعبالي من فكرة ان ينشر الهكرز صورنا الخاصة. گالت لي، اهدأ محسن، عندي صديق قرصان وهسه يساعده ويرجع حسابك. سألتني ليش انت كلش قلق، عندك شي اسرار؟! لا، گلت، آني ما عندي شي، بس

ضايح، لان خليتيج بموقف محرج. ضحكت ايملي وگالت، من شنو؟ من صورة على البحر؟ گالت، اذا تريد خلي ناخذ صورة اثينيه عاريين ونخليها بالفيس، وضحكت وگالت، المشكله الفيس مايخلي هيچ صور. وگالت اذا الهكر نشر صورتها راح تفرح وتخليها لايك.

كتبت رساله للهكر، وگتله قريبا اشتكي للشرطة، وراح يلگونك اذا انت بالسويد. أخيرا، الهكر صديق ايملي، ساعدني ورجع الصفحه مالتني. بلغت الشرطة وسديت الصفحه القديمه، وفتحت صفحه جديدة. واختفه الهكر، وبعد ما كتب لي.

بقيت أفكر بالموضوع، الى ان بديت اشك بفاضل علي. رحنت لصفحته اچيك صوره وأصدقائه. أخيرا لگيت بصوره القديمه، هواي صور وية السياسي حسين أبو الهيل. وبديت اقره التعليقات مالته. الى ان فهمت، هم عدهم گروب واحد، وأصدقاء وعدهم معارف مشتركين. اتصلت بفاضل، بعد القرصنة، وحاولت اطلع منه حچي. چان هو يسخر من القرصنة، ويگول لو مخابرنی، آني چان حليت لك الموضوع بدقيقه. طبعا فلت هواي حچيات ، خلت شكوكي تزيد بيه. بس ما چان عندي دليل قوي ضده. ويمكن غير ناس الي هكرو حسابي، متدري، العراقيين وضعهم صاير بكل مكان هوسه، ومتعب كلش، وماينفهم. عفت فاضل وأبو الهيل والإسلاميين والبعثين ورب الشيزوفرينين. گلت لفاضل علي، آني راح اقطع علاقتي وية العراقيين بالسويد. وشكرا ما محتاج مساعدة بالموقع. واني متأكد هو حس آني شويه اشك بيه.

چنت كلش ضايح، مو على القرصان! بس على قهر، وين وصل



بينه الحال، احنه العراقيين! الخبث والفساد والمعارك العشائرية والطائفية وتكميم الافواه، وصلت لهننا باوربا. شايلين امراضه وعقدنه وحقدنه، ومسافرين بيهن لكل مكان بالعالم. مع الأسف، بلد مثل العراق، بتاريخه الجبير، ينتهي يقدمونه هيح ناس للعالم. متخلفين وفاسدين وتفاهين، وكلهم خبث وانانية.

سويت موقع مجاني، ونزلت كتاب بلبل السيد. وماخليت مجال للتعليقات، لان اعرف تصوير هوسه. هواي ناس نزلو الكتاب. واجتني هواي تهديدات على الايميل. بلغت الشرطة طبعاً. بس بعد القرصنة، ماچان همي، كتاب بلبل السيد، الي صار بالنسبة لي مجرد شي بسيط، وهو مجرد بداية، شقه وية الجماعة، الي باسم الدين باغونا الحرامية. بقيت اصفن أكثر، بالحقيقة المرة الجبيرة، باسم الدين مو بس باغونا الحرامية، باسم الله، ومن مئات السنين، تخلف مجتمعنا وانترس خرافات وجهل. باسم الدين صار مجتمعنا ضعيف كلش، مجتمع مراهق، فكره توديه وفكرة تجيبه. مجتمع مو ناضج لان مو حر، لازم واحد لابس عمامة لو عنده مايكروفون مال خطبة جمعة، حتى يفكر بدالهم. جمعت كتب تحجي عن تاريخ العراق والدين. من يوم ذبحوا الحسين الي ذبح داعش والمليشيات. العباسيين والعثمانيين والاحتلال البريطاني والامريكي وهولاكو وبغداد والثورات والبعث والشيعة والسنة والقومية. نبشت تاريخ العراق، وبديت أسجل ملاحظات واخذ مقتطفات، وشوية شوية بدت تتوضح عندي فكرة كتاب جديد. بس هذي المرة راح يصير الكتاب، تلت أجزاء. هلمرة موضوعي مو جهة وحدة، او ميليشيا، لو طائفة معينة، لو حياتي. هدي هاي المرة هو كتاب يكون مثل، سيرة لتاريخ الجهل والتخلف!

چانت هاي اول مرة حوراء تبات بره البيت. چنت شوية قلق، راحت تبات يم صديقتها انيكا. اجت ايملي يمي. جايبه وياها بطل شراب احمر. من شافتني قلقان على حوراء، گالت، لازم تصير بعقلية هادئة ومنفتحة، احنه بالسويد، وفد يوم راح تجي فترة المراهقة والحفلات، ولازم تستعد، من حوراء ما تجاوب على تلفونك، وانت ما تعرف هي وين؟!!

چنت محضر مزات، ومسوي زلاطة مال فواكه، ايملي تحبها. اخذنا الصحون والواين، ورحنه للشرفة. قبل ما يتقرصن حسابي بديت آني اشرب شوية. بس واين احمر، وما أحب السكر القوي، يعني بس انسم كافي. چانت الدنيا صيف والجو يخبل، وچانت گدام شرفة الشقة مالتني، هواي أشجار ونباتات وزهور. دوختنه، ريحة النباتات وشرب الواين! وگفت ايملي، وانتجت على حافة الشرفة. چانت لابسه تنورة لونها اخضر فاتح، التفت لي وابتسمت. طبعا چانت تعرف آني خجول! التفتت مرة ثانية، وهاي المرة، خلت ايدها على طيزها، انوب ضحكت من مستحاي الزايد، ودارت وجهها للأشجار؟! ركعت آني وراها، طببت راسي جوه تنورتها، عضيت بأسناني طرف لباسها ونزلته. انوب وگفت، بست ظهرها، ورفعتن تنورتها، ودخلت بيها علىكيف. ظلت ايملي تشم حيل بريحة النباتات، وأني اروح وأجي، على كيفي، بهدوء وبطء، چنت اريد هاي اللحظة تطول للأبد، وما تخلص! بس هي اللذات لحظات! كل اللذات العظيمة بهاي الدنيا، تختفي بسرعه، وچنها حلم. خلصنه، اندارت ايملي، باستني وراحت للحمام. رحت وراها، اخذنه دوش سوية. بعدها، راحت ايملي وامتددت عارية على الفراش وبدت تسمع اغنية سويدية وتسترخي. لبست آني بس لباسي، واخذت اللابتوب

ورجعت للشرفة. ما أدري ليش بدت ترن براسي اغنية عراقية قديمة.  
بعدين.. مر طيف كريمة على بالي! ما نزلت الدمعة، بقت بالعين،  
ومن اشتغلت براسي اغنية (ذبي ثوب الحزن.. حزنچ اليمته.. مو  
حرام العمر.. ينگضي بسكته)). نزلت دمعتي.

شربت كاس واين ثاني، وچان بداخلي إحساس چبير بحب الحياة.  
فتحت صفحة بيضه بالنت. وطبعت عنوان كتابي الجديد:  
(خره بالله الغواد)).



## فهرس السبب

5	مقدمة: حسن بلاسم الحرية واللغة / علي بدر
11	بلبل السبب
25	صفئات البلب
37	طيارة البلب
51	شهداء البلب
63	تك تك البلب
75	كورونا البلب
85	بلبل الكاتب

طالما أدهشني حسن بلاسم،  
فهو وحيد بلا أسلاف، مثل  
قاطع الطريق بلا طريق. مثل  
الخارجين عن القانون في  
الروايات الفرنسية بلا قانون.  
حتى اللغة التي يستخدمها  
حسن بلاسم هي لغته التي  
يحورها كما يشاء. يستخدمها  
كي يتركها، لا يحنطها ولا  
يأخذها معه. فهي غير صالحة  
للاستعمال بعد أول  
استعمال، وهي بالية بعد أن  
تستنفد الهدف، فغايتها منها  
واضحة لتعبر عن خياله الذي  
يتلاعب بها بكل اتجاه، فهي  
التي تخضع له لا هو الذي  
يخضع لها، وهي تتبعه لا  
يتبعها، فإن جرب قواها  
فليكسرهما لا من أجل أن  
يحييها.

لا أكاد أن أعر على كاتب حر  
مثله، فهو يطلق جناحيه ليطير  
بكل اتجاه بلا هدف، بلا  
عنوان، بلا منهج يسير عليه،  
بلا تصنيفات.